

廣博嚴淨不退轉法輪經

劉宋涼州沙門智嚴共寶雲譯



清刻龍藏佛說法變相圖

廣博嚴淨不退轉法輪經卷第一

髮七

劉宋涼州沙門智嚴共寶雲譯

如是我聞一時佛在舍衛國祇陀林中給孤獨園精舍與大比丘衆千二百五十人俱爾時世尊於夜後分入無垢光三昧文殊師利法王子於夜後分入遍照三昧彌勒菩薩摩訶薩於夜後分入遍炬三昧爾時尊者舍利弗於夜後分明相出時佛神力故從自房出詣文殊師利房爾時尊者舍利弗欲入文殊師利房時遙見佛精舍邊有十千蓮華迴旋圍遶聞大音樂歌頌之聲彼諸蓮華出大光明遍照祇洹及舍衛國乃至三千大千世界爾時尊者舍利弗便不復見文殊師利房而自見身在文殊師利前立見文殊師利結跏趺坐而入三昧即便彈指不能令悟高聲聲

效亦不能悟爾時尊者舍利弗見文殊師利
如此神力自見其身處大海水欲從其所以
神足力乘空還詣本所住房而不能去爾時
尊者舍利弗即於文殊師利前結跏趺坐一
心瞻仰目不暫瞬時文殊師利與舍利弗東
行過一恒河沙世界到一佛土其世界名說
不退轉音聲佛號華光開敷遍身如來即見
彼佛身諸毛孔皆出蓮華其華遍滿一萬由
旬皆出光明遍照三千大千世界其華開敷
有百千葉金剛爲根光網爲莖阿牟荼碼碯
爲鬚閻浮那陀寶王爲臺其華臺上有菩薩
坐已於阿耨多羅三藐三菩提不退轉得陀
羅尼具五神通逮得諸忍以三十二相而自
嚴身身真金色爾時華光開敷遍身如來齋
中出一蓮華光色嚴淨有百千葉金剛爲根

青瑠璃爲莖因陀羅網寶爲鬚優勒迦娑羅
梅檀寶王爲臺其華明淨塵垢不汙空無坐
者爾時文殊師利往華臺上結跏趺坐即與
華俱上昇虛空乃至有頂還至佛所右遶三
匝頭面禮敬還坐華上一心合掌瞻仰世尊
爾時華光開敷遍身如來知而故問文殊師
利從何所來文殊師利白華光開敷遍身如
來言我從娑婆世界來爾時彼佛有二侍菩
薩摩訶薩一名美音二名妙音已於阿耨多
羅三藐三菩提不退轉從華臺下整衣服右
膝著地一心合掌白佛言娑婆世界去此近
遠時華光開敷遍身如來告二菩薩摩訶薩
言善男子娑婆世界今在西方過一恒河沙
佛上文殊師利從彼土來時二菩薩俱白佛
言娑婆世界現在說法佛名何等佛言彼佛

名釋迦牟尼今現在說法復白佛言彼佛世尊爲說何法佛言釋迦牟尼佛說三乘法復白佛言云何名三乘佛言三乘者所謂聲聞乘辟支佛乘佛乘時二菩薩白佛言諸佛說法皆不等耶佛言諸佛說法悉皆平等時二

菩薩白佛言云何平等佛言一切諸佛皆說廣博嚴淨不退轉輪法是故平等時二菩薩白佛言何故釋迦牟尼佛說三乘法佛言娑婆世界衆生心樂小法不堪大乘諸佛如來以方便力說三乘法釋迦牟尼佛出五濁世

變七

三

彼諸衆生不能堪受大乘之法以方便故分別說三時二菩薩白佛言釋迦文佛於娑婆世界說法甚難佛言如是如是彼佛說法實爲甚難時二菩薩白佛言我等今者獲大善利不生彼國佛言善男子莫作是言應速悔

過時二菩薩白佛言世尊我聞彼國說法甚難乃無一念樂生彼國何故悔過佛言速捨此語應當悔過所以者何若於此土二十億百千那由他劫種諸善根不如彼佛世界以一食頃說諸波羅蜜教一衆生受三自歸奉持五戒遠離聲聞心如是菩薩所行甚難何況以出家正法發菩提心而作饒益如是菩薩倍爲甚難功德無量所以者何娑婆世界多穢惡故時二菩薩白佛言娑婆世界有何穢惡佛告美音妙音娑婆世界穢惡之事以我神口盡汝壽量說不可盡所以者何彼土衆生煩惱厚重多行貪欲瞋恚愚癡無量無邊諸不善法以佛智力乃能具知時二菩薩即三讚歎善哉善哉釋迦牟尼善哉善哉釋迦師子善哉善哉釋迦仙王作是歎已一心

合掌懺悔先來諸不善心若離貪欲瞋恚愚
癡無量無邊諸不善法若曾發心求聲聞辟
支佛今悉懺悔亦欲明淨求佛智心順解脫
心爲得佛智故爲一切衆生故以無著善根
相應心持七寶華其華皆出百千光色有百
千葉金剛爲根因陀羅網寶爲鬚優勒迦娑
羅梅檀寶王爲臺以一切諸寶王爲莖其華
明淨塵垢不汙不可以眼識識不可以手觸
猶如幻化果報從三昧正觀生於虛空中遙
散釋迦牟尼佛上所散之華於虛空中變成
華臺華雲華蓋寶鬘寶雲寶蓋繒鬘繒雲繒
蓋供養釋迦牟尼佛復以百千種色華鬘末
香塗香細末梅檀遙散釋迦牟尼佛上而以
供養即於彼處五體投地頂禮釋迦牟尼佛
足作如是言南無釋迦牟尼佛及娑婆世界

諸菩薩摩訶薩發大莊嚴成就大精進力諸
先舊者能持正法有大威力能利益一切衆
生而作照明正求一乘能守護三世佛法城
塹不斷佛種住娑婆世界者作如是言我今
應往彼土見釋迦牟尼佛并諸菩薩摩訶薩
及餘衆生爾時華光開敷遍身如來聞二菩
薩作如是言又籌量觀察深心所行復以佛
法戒勅安慰告言善男子汝今欲往娑婆世
界見釋迦牟尼佛并諸菩薩及餘衆生者當
生尊重心憐愍心饒益心所以者何彼諸菩
薩於甚深法不生怖畏亦不誹謗能奉三世
諸佛教戒以無著心種諸善根不爲果報勤
行諸波羅蜜此諸菩薩摩訶薩以本願故生
彼佛土爲守護佛法城塹故亦欲遍學一切
佛法故汝等今欲往彼見耶時二菩薩白佛

卷七

五

言世尊若承佛神力及三世諸佛威勢護助
願欲往見爾時華光開敷遍身如來告美音
妙音二菩薩摩訶薩今欲往者當與文殊師
利法王子俱往彼善男子當共汝往爾時美
音妙音菩薩摩訶薩語文殊師利法王子言
我今因仁者力欲往娑婆世界見釋迦如來
并諸菩薩及餘衆生文殊師利言善男子我
今欲往十方世界多供養恭敬尊重讚歎禮
拜諸佛爲令一切衆生入佛菩提得佛智故
時二菩薩語文殊師利言我今亦共仁者至
十方世界供養恭敬尊重讚歎禮拜諸佛如
仁者爲一切衆生入佛菩提得佛智故我亦
隨學爾時文殊師利頂禮華光開敷遍身如
來右遶三匝尊重恭敬與彼菩薩并尊者舍
利弗受佛教已一心瞻仰漸漸却退以如幻

華而用散佛以衆華鬘聚塗香末香聚諸幢
幡蓋聚皆是先佛威神之力能生歡喜踊躍
欣樂以供養佛以供養法爲令衆生得解脫
故供養佛已猶如壯士屈伸臂頃於彼佛前
忽然不現在東方恒河沙佛前自然而現皆
悉如上說廣博嚴淨不退轉法輪彼佛世界
無有女人亦無聲聞辟支佛乘世界莊嚴皆
如華光開敷遍身如來佛上菩薩莊嚴充滿
其國亦復如是彼土諸佛齋中皆出一大蓮
華文殊師利而坐其上恭敬供養現諸神變
皆亦如上南西北方四維上下亦復如是一
方面恒河沙諸佛如來文殊師利而現其
前彼諸世尊皆說廣博嚴淨不退轉法輪亦
遣侍者菩薩摩訶薩此諸菩薩下蓮華臺一
心念佛合掌恭敬諮問彼佛云何名三乘亦

欲因文殊師利威神力往娑婆世界見釋迦

第七

六

牟尼佛聽受法教文殊師利皆悉安慰十方世界諸菩薩摩訶薩我當共汝至娑婆世界見釋迦牟尼佛如是時間於此娑婆世界閻浮提中夜猶未曉爾時尊者阿難從房門孔有光來入即從牀起出自房時見有光明照祇陀林日猶未出見祇陀林大水盈滿其水澄清無諸擾濁房舍園林悉皆不現便作是念今日必說未曾有法故現斯瑞爾時尊者阿難舉足入水不沒不濕心生歡喜詣佛精舍見一萬蓮華迴旋圍遶世尊精舍聞大音樂歌頌之聲彼諸蓮華出入光明照祇陀林及舍衛國乃至三千大千世界佛威神力乃令阿難心生歡喜右膝著地一心合掌頂禮世尊如是時間天已明了爾時佛精舍邊迴

旋蓮華中有一蓮華忽然而來至祇陀林處

中而住尊者阿難見是事已便作此念我今

應往爲佛世尊敷置法座所以者何今有此

瑞必說大法爾時阿難爲佛世尊敷置法座

當爾之時大地六變震動乃至十方恒河沙

第七

七

世界皆亦震動動遍動等遍動起遍起等遍起震遍震等遍震搖遍搖等遍搖涌遍涌等遍涌吼遍吼等遍吼是時天雨曼陀羅華鉢頭摩華拘物頭華分陀利華如是等華遍滿三千大千世界華果諸樹自然而現時比丘僧欲出祇陀園門而不能出見祇陀林大水盈滿其水澄清無諸擾濁房舍園林悉皆不現唯見大光遍照祇洹集在房門而作是言今現此瑞必說大法爾時世尊從三昧安詳而起出自精舍昇所敷座當爾之時釋迦牟

尼佛及十方佛放大光網其光皆有百千種色照明正法令諸衆生歡喜故爾時文殊師利遊諸佛土皆與二菩薩俱所經佛土皆悉禮拜供養諸佛尊重讚歎爲衆生故爲得佛智故爲攝衆生受教化故現不可思議神變之事隨其所樂而爲說法時文殊師利法王子知釋迦牟尼佛已昇法座與諸菩薩摩訶薩從地涌出住於佛前與無量阿僧祇百千萬億那由他菩薩摩訶薩遶釋迦牟尼佛滿百千帀持百千萬億種種色華其華有不可思議百千萬葉能生歡喜踊躍欣樂以散佛上所散諸華遍滿三千大千世界復以優勒迦娑羅細末栴檀而散佛上復以種種雜香其香亦有百千種色常出戒香忍香精進香禪香慧香智香方便香神通香六波羅蜜

香無所著香具諸道品方便之香其栴檀香能生歡喜踊躍欣樂其香光明皆是十方諸佛神力之所守護爲供養釋迦牟尼佛故發大精進勇猛精進超勝精進堅固精進無等等精進供養釋迦牟尼佛爾時文殊師利與諸菩薩摩訶薩更莊嚴此土化作八楞摩尼寶樹八觚分明亦有種種寶樹莊嚴寶蓋幢幡以摩尼寶網及諸鈴網而嚴飾之變此大地成摩尼寶於其地上造諸堂閣窓牖都欄妙寶牆壁大小諸河泉源華池優鉢羅華波頭摩華分陀利華摩尼寶華充滿其中以甘露水其水八味流注池中有種種鳥遊集其上作是變現爲令衆生心歡喜故爲得佛智故發大堪忍故發菩提心故現如是等無量神變是諸佛力亦是文殊師利法王子力亦

是釋迦牟尼佛本願之力爾時文殊師利及諸菩薩摩訶薩作是神變已住於佛前爾時世尊放從法生光遍照文殊師利及諸菩薩摩訶薩身為令坐故佛便微笑身出蓮華其華有百千種色出無量百千不可思議光金

剛為根因陀羅寶為鬘優勒迦娑羅栴檀寶王為臺在虛空中諸菩薩摩訶薩於其華上結跏趺坐釋迦牟尼佛於自齋中放一光明其光名曰照諸眾生最勝金剛王即此光中有一億那由他蓮華其華亦出若干種色其色寂靜無量無邊過於日光清淨香潔遍照十方其蓮華中自然變成微妙華帳而是華帳諸佛所護從法性生安隱寂靜順解脫門空無相無作不生不滅相應踰過三世平等眼所見文殊師利安坐華帳身相顯現一心

合掌正念觀佛所謂佛能通達一切諸法能生金剛喻三昧於一切法無所得三昧爾時世尊知文殊師利及十方諸佛所使菩薩摩訶薩樂求法者專向一乘已於先佛種諸善根為文殊師利之所守護無怯弱心勤修精進求佛菩提如是眾等安隱坐已爾時世尊告阿難言汝往遍告祇陀林中諸比丘比丘尼優婆塞優婆夷使集聽法爾時尊者阿難詣比丘房而告之言諸大德世尊今勅汝等來集聽法諸比丘言大德阿難我等先見此瑞不能得往阿難言以何事故而不能往諸比丘言我等見祇陀林中大水盈滿其水澄清無諸擾濁大光遍照房舍園林悉不復現以是事故不能得往時尊者阿難還至佛所白佛言彼諸比丘不能得來所以者何彼作

是言我等見是祇陀林中大水盈滿其水澄
清無諸擾濁大光遍照房舍園林悉不復現
以是事故不能得來佛告阿難彼諸比丘於
非水中而作水想不但於非水中而作水想
亦於非色中而作色想非受想行識中作受
想行識想非堅信作堅信想非堅法作堅法
想非八人作八人想非須陀洹果作須陀洹
果想非斯陀含果作斯陀含果想非阿那含
果作阿那含果想非阿羅漢果作阿羅漢果
想非聲聞乘作聲聞乘想非辟支佛乘作辟
支佛乘想阿難汝重往告諸比丘比丘尼優
婆塞優婆夷來集聽法此法皆是汝等昔所
未聞時尊者阿難復往諸比丘所而告之言
諸大德世尊告汝等來集聽法如是音聲遍
舍衛國諸比丘比丘尼優婆塞優婆夷普聞

此聲時尊者阿難知四部眾聞此語已還至
佛所而白佛言我已遍告四眾來集聽法爾
時世尊告大目犍連汝速往三千大千世界
遍告諸菩薩摩訶薩發大莊嚴者及諸比丘
比丘尼優婆塞優婆夷天龍夜叉乾闥婆阿
脩羅迦樓羅緊那羅摩睺羅伽人與非人敬
信佛法僧久種善根者集祇陀林聽受正法
此法汝等昔所未聞天人阿脩羅及餘世間
所不能轉唯於先佛所久種善根樂求大乘
最上乘第一乘無上乘無等等乘菩薩摩訶
薩發大莊嚴勤行此法者能受能轉尊者大
目犍連受佛教已即於佛前忽然不現猶如
壯士屈伸臂頃遍至三千大千世界菩薩摩
訶薩比丘比丘尼優婆塞優婆夷天龍夜叉
乾闥婆阿脩羅迦樓羅緊那羅摩睺羅伽人

與非人敬佛法僧久種善根者而告之言世尊告勅汝等來集聽法爾時目連承佛威神及已神足還至佛所白佛言諸聽法眾皆悉已集爾時四眾普來集會縱廣一千由旬在上諸天及餘眾住虛空中者縱廣五千由旬爾時文殊師利法王子白佛言世尊今此四眾諸來集者一心合掌頂禮如來供養恭敬世尊威德未敢就坐唯願世尊垂哀聽坐爾時世尊熙怡微笑是時有無量閻浮那提金光色蓮華從地涌出各百千葉尸利迦寶爲根因陀羅尼寶爲鬚赤真珠爲臺七寶爲莖大如車輪諸來會者在於佛前皆坐其上與文殊師利諸來菩薩摩訶薩三十二相而自莊嚴身具金色入於三昧身出光明爾時文殊師利及諸菩薩摩訶薩諸來四眾蓮華

臺上曲躬恭敬一心合掌瞻仰尊顏時文殊師利白佛言世尊今此四眾虛空諸天皆已坐定唯願如來等正覺說廣博嚴淨不退轉輪法今此眾會比丘比丘尼優婆塞優婆夷百千諸天皆生須陀洹果想斯陀含果想阿那含果想阿羅漢果想聲聞乘想辟支佛乘想唯願世尊爲除此眾如是疑想以何因緣世尊說須陀洹果斯陀含果阿那含果阿羅漢果聲聞乘辟支佛乘世尊默然時尊者舍利弗白佛言世尊我夜後分明相出時從自房出詣文殊師利房欲入房時遙見佛精舍邊有十千蓮華迴旋圍遶聞大音樂歌頌之聲彼諸蓮華出大光明照祇陀林及舍衛國乃至三千大千世界如是之相是何光瑞佛告舍利弗此是文殊師利所請瑞應爾時阿

難白佛言世尊我夜後分房門孔中有光來入即從牀起出自房時見有光明照祇陀林猶如日光見祇陀林大水盈滿其水澄清無諸擾濁房舍園林悉皆不現如是之相是何光瑞爾時世尊告阿難言此是文殊師利所請廣博嚴淨不退轉輪法瑞爾時世尊即爲阿難而說偈言

佛乘無有上 清淨無穢濁 文殊無畏者
今問如此事 是乘無分別 無漏無戲論
文殊無畏者 今問如此事 此乘無所有
畢竟無所生 是處不可著 文殊今已問
是中終不說 出生於諸果 諸佛導世者
說此微密語 菩提無音聲 亦無來去相
文殊無畏者 今問如此事 雖說諸音聲
其性不可得 文殊所問法 無音聲名字

音聲猶如風 無性無住處 文殊所問法
遠離諸音聲 阿難今善聽 文殊所問法
諸佛微密語 宣說菩提空 諸佛菩提法
皆悉空寂相 無有諸方所 亦無有住處
菩提如虛空 無生亦無滅 亦無去來相
唯佛能顯示 猶如虛空中 無有諸相貌
文殊今問此 妙淨菩提法 去來今諸佛
等說此菩提 非是可見法 亦無能見者
如此法性相 以音聲顯現 法界與菩提
二俱不相見 淨檀波羅蜜 尸羅亦復然
能淨忍辱者 顯現佛菩提 能淨於精進
禪定亦復然 淨慧淨智者 能顯示菩提
能淨於方便 到神通彼岸 無依無倚者
以聲說菩提 我說三乘法 諸果差別名
隨其所樂聞 分別而爲說 五濁世衆生

其心多怯弱 畏佛智慧故 不趣佛菩提
成就第四果 名曰阿羅漢 從聲得悟者
是名為聲聞 我說縛解相 因緣各差別
曉了此諸緣 能現見諸法 便名阿羅漢
亦號辟支佛 通達無生法 是名為菩薩
空三昧無作 無相無所有 從此解脫門
能入於涅槃 於前中後際 終不生染著
已離於方所 是故名無為 阿難汝當知
文殊問甚深 能解微密語 不分別諸果
文殊住一乘 不分別諸法 以是故問佛
諸果相所以 三世皆平等 空寂無性相
遠離諸音聲 不分別菩提 文殊所教化
諸來大菩薩 二十恒河沙 其數不減少
今來詣我所 欲聞菩薩行 亦欲聽三乘
種種差別相 文殊無畏者 為除彼疑故

是故來問我 果相及乘相 此是佛威神
亦是本願力 為拔苦眾生 分別說三乘
文殊無畏者 慇懃勸請我 唯願大法王
說菩薩所行 百千億眾天 供養佛世尊
皆著諸果相 願除此疑心 今此四部眾
比丘等來集 著諸果音聲 不解微密語
為除此疑故 文殊今問我 以是眾因緣
諸菩薩來集
爾時阿難白佛言文殊師利法王子問佛世
尊廣博嚴淨不退轉法輪法耶佛言阿難如是
如是文殊師利法王子問我廣博嚴淨不退
轉法輪法所以者何諸佛世尊皆轉廣博嚴淨
不退轉法輪法阿難白佛言以何因緣世尊說
堅信堅法八人須陀洹斯陀含阿那含阿羅
漢聲聞辟支佛耶世尊彼之所行是菩薩法

耶佛告阿難如是如是彼之所行是菩薩法所以者何五濁衆生心樂小法不求大乘是故諸佛以方便力隨衆生性而爲說法以諸衆生多樂小法不堪大乘如來以方便力觀其深心令發道意入佛智慧阿難如來以如是方便度諸衆生到安隱處無爲無作離心數法皆悉平等永滅苦樂無有方所亦無住處安隱寂靜無餘涅槃爾時世尊說是語已而便默然時尊者阿難問文殊師利言以何緣故如來默然文殊師利言尊者阿難以諸衆生聞說是法少能信者是以默然世尊說微密之語唯我能了今四部衆咸生此疑以何緣故世尊說堅信堅法乃至聲聞辟支佛耶今此百千萬億那由他諸天亦有百千萬億那由他諸菩薩摩訶薩皆生疑心世尊何

發七

十五

故說堅信堅法乃至聲聞辟支佛乘以佛默然而不說此難信法故諸河泉源大小諸水湛然不流空中諸鳥停住不飛日月不行一切燈炬無復光照一切衆生無有威光所以者何世尊默然而不解說難信法故爾時世尊所住精舍一萬蓮華迴旋圍遶者皆發此言唯願世尊說廣博嚴淨不退轉輪法所以者何我等曾於此處聞九十二億百千那由他諸佛皆說此法是時尊者舍利弗白佛言世尊願說廣博嚴淨不退轉輪法所以者何我夜後分與文殊師利法王子至東方恒河沙佛土是諸如來皆說此法南西北方四維上下無量無邊不可計數諸佛世尊皆宣此法時虛空中有八十萬五千那由他諸天白佛言世尊願說廣博嚴淨不退轉輪法所以

者何我等曾於此處聞九十二億百千那由他諸佛皆說此法爾時尊者阿難白佛言世尊以何因緣說堅信堅法乃至聲聞辟支佛今此四眾咸皆默然乃至無有聲歎之聲今此會中百千萬億眾皆生疑惑世尊何故說堅信堅法乃至聲聞辟支佛乘唯願世尊拔此大眾心中疑箭此諸大眾是佛時證佛告阿難如是如是諸佛世尊所說之法皆有時證阿難白佛言誰是證耶佛告阿難法是我證諸佛如來以法爲證而有所說佛告阿難諦聽諦聽善思念之吾當爲汝分別解說菩薩摩訶薩名曰堅信乃至名曰辟支佛乘時尊者阿難諸大聲聞皆悉一心聽佛所說佛告阿難菩薩摩訶薩令無量無邊阿僧祇眾信佛知見信佛知見已不著色不著受

要七

十六

想行識以不著色不著受想行識故是菩薩摩訶薩名爲堅信復次阿難菩薩摩訶薩信諸佛所說法皆悉空寂信此法者是菩薩摩訶薩名爲堅信復次阿難菩薩摩訶薩信於佛智便作此念我等亦當成就此智亦不見此智是故阿難菩薩摩訶薩名爲堅信復次阿難菩薩摩訶薩於五欲樂不生欣樂成就信力是故菩薩摩訶薩名爲堅信復次阿難菩薩摩訶薩作是念如佛世尊以不可思議法施諸眾生我亦應學以不可思議法施諸眾生如是菩薩摩訶薩名爲堅信復次阿難菩薩摩訶薩心生歡喜捨一切物乃至自身尚以布施何況餘物信行此施而不倚著於一切處不生慳吝以此因緣迴向菩提亦不起菩提見是菩薩摩訶薩名爲堅信復次阿

難菩薩摩訶薩信心清淨無有怯弱十七於佛法

僧心得淳淨守護六情無所願求無信衆生

於佛法僧令生信樂已生信樂心不放逸發

菩提心不著心相信知六界與法界等云何

信知所謂此界以諸音聲名字故說實不可

得信知諸行是無常苦空無我之法亦信無

漏聖戒非戲論法具諸三昧信一切衆生即

是滅界衆生之相即是滅相以無依心見諸

衆生即是法界而於此法不見法界所以者

何法界即是衆生無心之界菩薩摩訶薩如

是信者名爲堅信信一切衆生無有住處所

以者何自性空故亦復不見衆生形相見諸

衆生同涅槃相所以者何衆生界空是故即

見是涅槃相若有信解如是法者令諸衆生

得如是信是故阿難菩薩摩訶薩名爲堅信

爾時世尊欲重宣此義而說偈言

能令諸衆生 信向佛知見 心不生染著

是名爲堅信 信諸佛說法 其性相皆空

能信解此法 是名爲堅信 信諸佛知見

是不可思議 發心而勤求 我應得是智

不生信樂心 貪求五欲樂 是信力成就

是名爲堅信 信諸牟尼尊 以法施衆生

我亦應隨學 是名爲堅信 信能行布施

乃至捨自身 亦不生施想 是名爲堅信

信能捨一切 不生慳悋心 盡迴向菩提

是名爲堅信 信向於諸佛 其心無穢濁

亦信無心法 是名爲堅信 能守護六情

亦不復願求 已信解此法 是名爲堅信

諸不信衆生 以信而建立 令隨順佛法

是名爲堅信 以此信向心 盡迴向菩提

而不得心相	是名為堅信	知六界平等
即與法界同	以音聲分別	不得諸界性
信諸行無常	苦空無有我	成就此信力
是名為堅信	信無漏聖戒	非是戲論法
具戒三昧者	是名為堅信	信諸衆生界
即是滅界性	能信如是相	是名為堅信
衆生無依性	即是諸法界	如此諸法界
其性難思議	若能如是信	隨順彼法相
此無畏菩薩	是名為堅信	信諸衆生身
畢竟無所住	其性本空無	是故無處所
衆生是涅槃	其性即空故	以是義顯示
寂靜涅槃相	若能如是信	名無畏菩薩
如是諸衆生	皆名為堅信	阿難善受持
亦如是宣說	若有如是信	是名為堅信
如是等諸法	餘無量無邊	佛為諸菩薩

說此差別相

如是阿難如來等正覺以方便力為聲聞人說菩薩摩訶薩為堅信復次阿難今當為樂此法衆生復以偈頌說菩薩摩訶薩名堅信義爾時世尊欲重宣此義即說偈言

卷七

十九

皆共和合一心聽 我說佛子諸功德
 布施持戒及精進 忍辱禪定智慧身
 信向樂求如是法 不信者信佛淨智
 有如是信名菩薩 導化世間無厭倦
 信解諸法無分別 其性空寂佛所說
 若能善解如是法 是名菩薩堅信者
 信佛知見無有量 發心欲求如是智
 無上大人所有智 我當何時得此智
 不信欲樂是淨法 不為欲因行惡業
 以信力故樂求法 有此勝信名菩薩

信諸如來以法施 我亦應當如是學
佛所說法隨順行 有此勝信名菩薩
信能捨此上饒饌 象馬金寶及奴婢
男女眷屬所愛妻 大小村城及國土
亦以手足肢節施 破骨出髓無所畏
耳鼻眼目及以頭 有此勝信名菩薩
信知此身內無主 是故能以惠施他
亦復能以妙法施 以是因緣求佛智
信能捨此無我身 見來求者心歡喜
如是衆生我善友 爲菩提捨危脆身
信如是法菩提因 以清淨心化世間
聞法不疑佛知見 有此勝信名菩薩
知眼無常及耳鼻 舌身及意亦復然
知是虛僞無牢固 爲菩提因悉能捨
見苦衆生無信手 化令住信能信施

自住慈悲愍世間 皆令信佛最上智
見著六塵行惡者 化令迴心趣佛智
不得此心菩提因 能信菩提無心相
見諸衆生無界智 不知六界是平等
此法皆同法界相 以音聲說不可得
見諸衆生在生死 第七 無常計常癡冥中
教信諸行是無常 令信解空無有我
見諸衆生行惡戒 教令信佛無上戒
自淨戒定諸功德 有此勝信名菩薩
見諸衆生多懶惰 教令信佛大精進
智精進力自調伏 能持此信名菩薩
見愚衆生計壽命 教信陰身無有壽
了知滅界同法界 若知此法是勝信
分析此身無去住 雖復異世業不忘
所造善惡諸業因 終不遠離此法性

見衆生性無依法 此界亦同諸衆生
法界平等不思議 無畏菩薩如是信
佛說此信無有二 勤修善行知諸法
亦爲他說如是信 而不染著於三有
信如是等衆生性 無有決定常住處
空不可取無相法 能信是法名菩薩
是諸衆生如空空 亦不寂靜涅槃界
不可說有諸性相 知是法者名持信
見諸衆生住邊法 以寂靜法而導之
故於三界得高稱 亦名持信勝菩薩
若有如是妙勝信^{製七} 發無畏心樂求法
我法若有點慧人 廣向時衆而宣說
已說堅信諸功德 及餘種種差別相
不著三界清淨心 憐愍衆生良福田
長夜布施自調伏 住清淨戒修忍辱

精進修定及智慧 行菩薩行心調伏
以諸相應方便智 導衆生到安隱處
能令不墮諸惡趣 有如是智名菩薩
以真淨心動世界 震起波涌有六種
光照華上坐菩薩 皆說寂靜空無法
東方國土及南方 西方北方亦復然
上方下方及四維 皆同說此寂靜法
寧捨身命不疑佛 亦教他人信佛智
若諸衆生有是信 佛及行者能證知
廣博嚴淨不退轉法輪經卷第一

音釋

觚 古胡切 析 先擊切
稜也 分割也

廣博嚴淨不退轉法輪經卷第二

髮八

劉宋涼州沙門智嚴共寶雲譯

復次阿難云何如來說菩薩摩訶薩名為堅法阿難當知菩薩摩訶薩於佛法終不退轉受持佛法為他宣說終不毀犯於不可思議真如法界應當逮得如是等法堅心受持而無法弱能觀諸法真實之相不生染著故而於此法無所受持於法非法亦不生著應如是持樂求諸法求已能受受已能持持已能說歡喜調柔易可共住常樂宣說寂靜之法不動法界能逮諸法真實之相於諸法中善得調伏亦不毀損常住妙身如此之身常住故妙應知此身無始無終無聚無散應如是知如佛世尊為諸菩薩分別解說於此法中亦應逮得見一切法清淨無垢善解諸法

無可著處諸法性空不可得見以不見故無所受持宣說法界無相無性無有言說亦無所有無有思想遠離思想心不可得其性寂靜離諸音聲無有言說非境界法常樂受持宣說是法而於是法心無所依以如是等無所有法種種差別為菩薩摩訶薩說而於此法不作合散無種種相如其所說皆以逮得已得此法名為性地性地菩薩摩訶薩乃至於少法中不生來去想已能受持不來去法而於此法不生增減亦無聚散若能受持不增不減不聚不散如是等法是名堅法菩薩摩訶薩於諸法性得無所得已於此法性無所得故是菩薩摩訶薩名為堅法爾時世尊欲重宣此義而說偈言

於諸佛正法 而無有退轉 能持如是法

是名爲堅法	未曾有毀犯	不思議法界
能逮如是法	是名爲持法	久發心受持
諸佛所說法	心無有怯弱	是名爲持法
於一切法性	正趣而勤求	不生染著心
是名爲堅法	不著亦不住	亦能教示他
能持如是法	是名爲堅法	調柔易共住
宣說寂靜法	不動彼法性	是名爲持法
了知諸法體	而無有性相	於此法決定
是名爲持法	亦未曾毀損	常住真妙身
當知此身者	即是法爲體	此身無終始
諸法之所成	於此無增減	是名爲持法
佛爲諸菩薩	宣說諸法相	能得如是法
是名爲持法	此界性自空	於法無染著
能持如是法	是名爲持法	觀察一切法
性空不可見	以不見法故	亦復無所持

以無所持故	能顯示法界	無性相音聲
其體無所有	遠離諸思想	心亦不可得
以不得心故	名不可思議	已遠離心相
宣說寂靜法	無音聲境界	名不可思議
能持如是法	亦復無所依	不依無所有
是名爲持法	佛爲諸菩薩	宣說如是法
不合亦不散	亦無種種相	若說於此行
得住於性地	已住於性地	即名性地人
住性地菩薩	畢竟無所依	能持如是法
是名爲持法	以是故阿難	菩薩摩訶薩
於法無所得	即名爲持法	若有諸衆生
佛道生遠想	以方便力故	令住究竟處
如是法及餘	爲諸菩薩說	以微妙方便
顯示佛知見	持法大明人	唯佛能證知
及修行此法	無畏諸菩薩	不可思議智

說持法差別 法非法清淨 安住是法中
如是阿難如來等正覺以方便力故爲聲聞
人說菩薩摩訶薩名爲堅法復次阿難云何
如來說菩薩摩訶薩名爲八人阿難當知菩
薩摩訶薩已過八邪修八解脫不著八正過
凡夫法而無所住逮平等道過凡夫法勤求
菩提不得菩提離諸邪見而修正見逮平等
道離自身相雖未得佛身而求菩提離衆生
想而修佛想逮平等想離衆生巢窟法求無
巢窟法於諸法中而無所住所以者何不見
有法而可住者過世間法開通聖法已逮滅
界亦不著世間及出世間法遠離有無是法
非法善能觀察斷常二邊觀去來現在心相
乃至菩提心相亦不可得所以者何已逮衆
生心相平等法故是以毒不能害人不能燒

刀不傷身所以者何已能遠離諸境界故雖
未得佛行已於諸趣無有決定所以者何菩
提離諸趣故菩提趣者安靜無爲菩提性空
無有處所是以刀不傷身名不可害其乘速
疾名不可害所以者何逮達此乘無有罣礙
以是事故刀不傷身亦有遍緣衆生慈菩提
行慈一切衆生界不可得無所行慈一切法
空慈起寂靜界慈離瞋恚慈行智明慈能照
菩提衆生界不可得慈遍緣衆生故刀不能
傷知欲界色無色界皆悉平等亦知法界平
等知菩提無種種相不可知不可著無戲論
無垢穢安隱寂靜離諸音聲菩薩摩訶薩能
了知是界於諸趣中所有言說音聲皆能了
知所以者何以於無來去法界中得無住法
忍故善知一切衆生言音而爲解說寂滅之

法不作是念我於是時為此衆生說法已遠
離我想諸音聲故知諸法寂靜故於諸法中
不取其相不可得故不著言說故是菩薩摩
訶薩名爲八人爾時世尊欲重宣此義而說
偈言

已過於八邪	正住八解脫	不著八正見
是名爲八人	已過凡夫法	而不住正道
處中離二邊	是名爲八人	已過凡夫法
而勤求菩提	不得菩提相	是名爲八人
遠離諸邪見	能修行正見	速得平等道
是名爲八人	遠離自身相	而不住菩提
雖未得佛身	是名爲八人	除去衆生想
能修行佛想	已逮平等想	是名爲八人
離衆生巢窟	求無巢窟法	不住於諸法
是名爲八人	已過世間法	而開通聖法

成就於滅界	是名爲八人	諸佛所說法
及餘世間法	不得此法相	是名爲八人
見有是一邊	見無第二邊	能捨如是見
是名爲八人	觀察中道法	及與斷常邊
如是平等相	是名爲八人	不得過去心
及與未來心	現在心不住	是名爲八人
所說最初心	能生菩提者	此心不可得
云何得菩提	若能逮得此	不得菩提心
故毒火不能	傷害壞其身	其趣雖不定
遍修如是行	速無去來法	故名不可害
菩提無趣相	以音聲故說	善解音聲相
故名不可害	去相不可得	來相亦復然
音聲說去來	故名速疾乘	是故名安隱
亦名爲空無	亦名速疾乘	亦名不可害
如是速疾乘	菩薩應通達	無能罣礙者

是故名不害	設以利刀刀	不能傷其身
不見於身相	故刀不能害	遍緣衆生慈
及以菩提慈	行菩提慈故	不爲刀所害
無行無衆生	不得衆生界	寂靜無生慈
遍緣衆生慈	遠離瞋恚慈	及行智明慈
能照菩提慈	遍緣諸衆生	解刀是空法
善修於身想	未得菩提道	不爲刀所害
已逮寂靜界	遠離諸惡趣	惡業不能障
不爲刀所害	遠離於無明	已證智明法
逮得菩提照	是名爲八人	能知欲色界
無色界是空	皆悉是平等	是名爲八人
界與菩提等	無有種種相	無知無分別
清淨無戲論	已逮此平等	菩薩無所依
所說諸音聲	能遍至諸趣	來去諸音聲
皆歸於法界	於無住法中	得此最上忍

善解衆生音髮八 爲說寂滅法大 不生如是心
我爲彼說法 已過音聲法 不取種種相
知諸法寂靜 是名爲八人 已過諸音聲
通達音聲界 故名爲八人 不著音聲者
阿難以是事 是名爲八人 雖作如是說
其實不可得
如是阿難如來等正覺以方便力爲聲聞人
說菩薩摩訶薩名爲八人復次阿難云何如
來說菩薩摩訶薩名須陀洹阿難當知不可
思議佛道名須陀洹菩薩摩訶薩住無所住
近於佛道不受諸法無所依倚亦無所緣不
住諸法畢竟無生菩薩摩訶薩爲得是道故
堅固精進堅固思惟無有懈怠終不違逆心
無所依諸佛所乘無上最勝出要之道不著
此道亦不住中以如是道推求諸法雖復推

求而無所得而於彼道不動不住於道想生死想佛想能生平等於結障法平等諸法平等諸佛平等遠離身見能生佛見開悟諸見修對治想已過我想阿難以是事故菩薩摩訶薩名須陀洹不著佛道遠無染道不疑佛菩提不選擇戒乃至不見佛戒以不見故不選擇戒不分別戒永斷三結不住三界已遠佛道離衆生想無所依止離依止法專求佛道得安隱寂靜道不惜身命以歡喜心能捨一切物顏貌和悅無有鬻處爲菩提故而行布施無有少物而不能捨爲濟苦衆生故令到涅槃故爲修有相法故得無相法故離衆生想入衆無畏說寂靜法淨菩提道無所怖畏乃至無有死畏所以者何以遠得寂靜法遠離塵垢安住佛道善修惡趣諸平等想得

無戲論道阿難以是事故菩薩摩訶薩名須陀洹爾時世尊欲重宣此義而說偈言

不思議佛道	名爲須陀洹	若有住此道
必流入菩提	此道如虛空	不依一切法
無緣無所住	所有不可得	菩薩堅精進
能逮如是法	諸佛導世者	無上出要道
不染著此道	亦復不住中	以此道推求
不見一切法	此道無動搖	亦復無住相
不懈怠如佛	不逆無所依	所說生死想
佛想亦復然	能於此平等	知是須陀洹
諸結及與障	能覆佛道者	皆悉能遠離
是名須陀洹	能斷於身見	而生於佛見
開悟諸邪見	善修對治想	善修自身想
知我想過患	是名須陀洹	不著於佛道
設生此猶豫	我不得菩提	即得無染著

而求於佛道	亦不選擇戒	不願佛尸羅
已斷於戒想	不分別尸羅	永斷於三結
不住於三界	已逮得佛道	善修衆生想
以無所緣道	而求於菩提	已逮寂靜道
佛無垢菩提	好樂行布施	和顏無顰蹙
不惜於身命	爲無戲論道	爲苦惱衆生
一切皆能捨	令過須陀洹	妙勝果之上
遠離諸有想	善通達無相	以是故無有
惡名諸怖畏	所說法非法	二俱能遠離
於中不染著	無有惡名畏	若入大衆時
其心無所畏	宣說寂滅法	已淨菩提道
若起衆生想	能生其真實	以是故無垢
遠離一切畏	已離一切怖	乃至無所畏
已得寂靜道	安隱無有上	知惡趣平等
而不生怖畏	此道現在前	無有吾我想

菩薩知是法 名爲須陀洹 爲樂小法者
而作如是說 以微妙方便 宣說於佛法
於道放逸者 令入如是法 諸佛之導師
捨方便而說 爲諸久行人 求最勝道者
以是故阿難 我說須陀洹 不點慧衆生
謬分別是事 以是故阿難 我說須陀洹
點慧諸衆生 能解了是事 凡小無智心
不解微密語 愚小起諍訟 不解微妙義
滿足多百法 乃名須陀洹 以須陀洹名
顯示諸佛法

如是阿難如來等正覺以方便力爲聲聞人
說菩薩摩訶薩名須陀洹復次阿難云何如
來說菩薩摩訶薩名斯陀含阿難當知菩薩
摩訶薩隨學佛智解了菩提不從緣生爲無
緣智故而求佛智以衆因緣求無處所禪而

求佛智得燒煩惱法燒諸煩惱得佛平等法
求未得法如諸佛阿羅訶三藐三佛陀雖度
眾生而不動眾生求不動眾生界有諸眾生
慧心微薄愁憂苦惱不解法界欲令此眾住
於智故而求佛智於根力覺道解脫三昧先
自覺悟覺悟眾生而求佛智所可用智能至
道場爲得此智而求佛智佛眼是不可思議
無障礙眼恒以此眼利益世間爲求是智眼
故求智中勝智所可用智知一切法如如亦
不得此智所可用智令一切眾生住是智中
所謂不住一切法智以是事故而來此間來
已見眾生界是不可思議界求是界已不得
此界眾生從何而生不知眾生生處從眾生
界有差別名觀察法界眾生界時不見是差
別相見眾生界盡入法界見法界是平等道

佛法道是眾生不可得道眾生平等智道爲
求是無比智故此智清淨離塵垢不得此智
不可以此智求知此智是無所知智菩薩摩
訶薩以此智故而有差別未得此智爲求此
智而來此間阿難以是事故菩薩摩訶薩名
斯陀含爾時世尊欲重宣此義而說偈言
隨學諸佛智 其智無有上 以求佛智故
是名斯陀含 所說眾因緣 能生於菩提
爲知是緣故 是故來此間 所說無處禪
能燒諸煩惱 以是故來此 爲生此禪故
先所未得法 一切智所行 我亦欲求故
而來於此間 不動諸眾生 法界亦如是
爲不移動故 是故來此間 苦惱無點慧
愁憂諸眾生 欲令如是眾 住佛無量智
諸根力覺道 解脫及與禪 自覺覺他故

而求於佛智 能趣向道場 先佛所行法
爲求此法故 是故來此間 爲求如是智
不思議佛眼 求如是眼故 而來於此間
諸佛導世師 所行巧方便 爲求如是智
諸智中最勝 諸所可用智 能知諸法如
此智不可得 云何求諸法 願令多衆生
安住無上智 亦欲令他知 故來於此間
來已見衆生 其界不思議 是以斯陀含
來此求衆生 以求衆生界 衆生不可得
是故雖來求 亦復不可知 不知諸衆生
及以衆生界 若能知此界 知衆生差別
觀察一切法 觀已無所見 安住於定心
而求諸佛法 若有此淨智 無垢性清淨
亦不得此智 而知於所知 以如是衆生
能速得此智 名無依菩薩 是故來此間

阿難以是事 名爲斯陀含 無黠慧衆生
謬分別是事 阿難以是事 名爲斯陀含
勤精進衆生 乃能知是事 慧者解微密
於深法決定 能解如是義 速能生菩提
如是阿難如來等正覺以方便力爲聲聞人
說菩薩摩訶薩名斯陀含復次阿難云何如
來說菩薩摩訶薩名阿那含阿難當知菩薩
摩訶薩以過分行得佛所行遠離一切諸所
行法知無來去法於諸法中無所依無所住
是故不來此間所以者何亦不見法來去相
故已過凡夫離凡夫想亦離佛想過無所住
法無有因緣能使來者所以者何已逮寂靜
界故諸佛導世者說凡夫禪不往生彼離諸
難處永斷愛欲不貪摶食永離食想逮得菩
提示諸邪見無所貪著知六十二見性同涅槃

樂離諸蓋想離諸法中所有過患清淨無垢
制伏憍慢拔無明箭已害愛結無復喜愛燒
諸煩惱離一切想拔憂惱箭離慢大慢善知
諸陰逮諸照明乘不可思議佛乘得菩薩摩
訶薩性離欲汙泥得先佛所藏最勝智藏無
增無減得一切衆生乘中最上佛乘離有無
相斷一切疑菩薩摩訶薩成就如是法不來
此間名阿那含復次阿難菩薩摩訶薩有緣
衆生令住菩提云何而住所謂衆生即是菩
提菩提即是衆生能覺衆生想所以者何已
了知空性故知衆生界是不可思議界故是
故能覺此想能知衆生界即是虛空界虛空
界空故遠離衆生界虛空界離虛空性無所
止住虛空界虛空性空以如是法令諸衆生
迴向菩提所以者何知衆生是虛空界衆生

界皆入虛空界所以者何衆生性諸法性各
各相入所以者何以不可得故以不可得故
不來此間是故數名阿那含一切諸法中無
有數相諸佛已過數相阿難以是事故菩薩
摩訶薩名阿那含爾時世尊欲重宣此義而
說偈言

已離不復來 更不修分行 已離分行故
是名阿那含 善知來去相 不依一切法
不得少處所 而可來此間 諸佛導世師
所說凡夫禪 更不往彼間 是名阿那含
諸法無來相 去相不可得 逮無來去相
是名阿那含 其人更不復 趣向三惡道
已逮諸佛法 是名阿那含 永離一切欲
不貪於搏食 已逮菩提道 是名阿那含
所說諸見處 凡有六十二 更不住見處

故名阿那含	諸法無性相	已離於性相
如實了知故	更不來此間	說涅槃寂靜
能燒諸煩惱	能遠離諸想	故不來此間
已斷諸難處	能遠離塵垢	到安隱涅槃
是名阿那含	已降伏惡魔	及其諸眷屬
不爲彼所動	是名阿那含	已拔無明箭
亦害諸愛結	已覺知喜愛	是名阿那含
能燒諸煩惱	亦離諸有想	決定勝妙果
是名阿那含	已拔憂惱箭	除去諸憍慢
善知五陰相	是名阿那含	已逮諸照明
不思議佛乘	遠離欲汙泥	是名阿那含
已得大智藏	先佛之所藏	諸藏中最勝
是名阿那含	已安住無上	諸佛之大乘
永斷諸疑心	是名阿那含	有緣諸衆生
皆令住菩提	爲彼住菩提	而不來此間

能知諸空界 衆生界難思 已離如是想
是名阿那含 能知衆生界 及以法界空
不得諸衆生 是名阿那含 其心更不求
取著諸有想 已到無相處 是名阿那含
阿難以是事 名爲阿那含 以無所住法
而住佛法中
是故阿難如來等正覺以方便力爲聲聞人
說菩薩摩訶薩名阿那含復次阿難云何如
來說菩薩摩訶薩名阿羅漢阿難當知菩薩
摩訶薩離諸分行應行佛行拔濟一切衆生
行破諸煩惱應爲煩惱所苦衆生解煩惱縛
而不得衆生亦不得煩惱縛應作是事名阿
羅漢捨有所得住無所得知一切空此空亦
空通達無相已離諸相離一切想知衆生想
是過患法能捨無智達無心法曉了空法應

速菩提應生不可思議佛菩提以是事故名
阿羅漢應宣說法如三世佛已說今說當說
其所說法皆悉寂靜無有戲論清淨無穢通
達是事故名阿羅漢應令衆生住於菩提知
一切法及與菩提是無所有而不可取應修
佛慈不著衆生慈以如是慈遍緣衆生而不
得衆生已逮衆生不可得慈故名阿羅漢應
說諸法利益衆生而不起法非法想於諸法
中應常在先是名阿羅漢應爲衆生說根力
覺道而於此法不染不著不染不著故名阿
羅漢應令衆生知清淨菩提令彼衆生起如
是菩提故名阿羅漢應於世間衆生利養而
不貪著應爲衆生說不貪著利養故說此法
故名阿羅漢應往諸佛世界應見諸佛如佛
見佛見如是佛世界已應當發心求如是世

界所謂不可思議世界不可量世界無等等
世界無邊世界無戲論世界不可說世界空
世界無相世界無作世界不退轉世界離女
人世界離婬欲世界無煩惱世界佛無礙辯
世界菩薩世界無障礙世界無染世界降魔
世界無怨敵世界畢竟涅槃世界此諸世界
於一切世界中上應求如是世界故名阿羅
漢未生諸法應生起故名阿羅漢於欲不染
於可瞋法不生瞋故名阿羅漢於無上滅集
智速通達故名阿羅漢以阿羅漢故名爲菩
提以菩提故名阿羅漢菩提不動以衆生界
不動故應令百千萬億衆生住菩提道住菩
提道故名阿羅漢一切衆生及與菩提從無
分別生應以是平等法教諸衆生此平等法
於一切法中無與等者此平等菩提從無分

別生應知如是法知是法已爲衆生說無有增減成就無增減法故名阿羅漢應說如是離音聲法故名阿羅漢應解如是多衆生著所謂衆生不可得著衆生斷常著衆生身見著不能過著見諸法不生不滅無爲無作著不壞色著不壞受想行識著離凡夫法著建立諸佛法著須陀洹果想著斯陀含果想著阿那含果想著阿羅漢果想著辟支佛果想著如來等正覺想著求菩提心想著菩提心想著爲菩提故行施著爲菩提故護戒著取瞋恚相行忍著取懈怠相行精進著取亂心相生禪定著取惡慧相修智慧著於父母妻子男女眷屬兄弟姊妹所愛諸親著欲見愛念諸親著樂談說著煩惱法出要法作二見著貪利養著見在家出家著見卑勝法著離

凡夫法著緣佛法著見下上法著具足諸相方便著生佛世界想著應除衆生如是著故名阿羅漢亦不分別是衆生是涅槃法是衆生非涅槃法是衆生能生法是衆生不能生法是衆生行菩提是衆生不能行菩提是衆生持戒是衆生毀戒是衆生多福是衆生少福不起如是二見名阿羅漢亦不分別是衆生是福田是衆生非福田是衆生精進是衆生不精進是衆生凡小是衆生智明此是女人此是男子此是非男非女此是法此是非法不起如是二見名阿羅漢亦不分別是衆生於菩提退轉是衆生於菩提不退轉是衆生於菩提得自在是衆生於菩提不得自在是衆生近菩提是衆生遠菩提發如此心我當得菩提入無餘涅槃略說能除衆生一切

卷八

十六

著故名阿羅漢阿難阿羅漢如是除衆生著
已亦爲衆生說衆生實性說是法故菩薩摩
訶薩名阿羅漢爾時世尊欲重宣此義而說
偈言

已能捨一切	所有諸分行	能捨分行故
是名阿羅漢	能斷諸煩惱	及苦衆生結
皆令得解脫	是名阿羅漢	遠離有所得
住無所得法	知一切法空	是名阿羅漢
已能知解空	亦通達無相	遠離一切相
是名阿羅漢	應行最勝行	諸佛之所行
度脫諸衆生	生死大險難	已離一切想
知衆生想過	能捨諸想故	是名阿羅漢
捨諸無智想	通達無心法	已知空法故
是名阿羅漢	應逮得諸佛	不思議菩提
應勤行精進	是名阿羅漢	應宣說諸法

清淨無戲論	令衆生住道	是名阿羅漢
應以遍緣慈	令衆生安樂	而不得衆生
是名阿羅漢	應宣說諸法	於衆最第一
無法非法想	是名阿羅漢	應爲諸衆生
說根力覺道	不染著世法	是名阿羅漢
應令他衆生	覺了清淨法	亦能生菩提
是名阿羅漢	應不生貪著	世所有利養
不貪利養故	是名阿羅漢	應往詣諸佛
嚴淨佛世界	諸佛所住處	爲衆生說法
應當發是心	求此嚴淨界	應求是界故
是名阿羅漢	於欲無所染	瞋處不生瞋
知菩提平等	是名阿羅漢	已於滅集智
通達寂滅相	以菩提道故	是名阿羅漢
於諸衆生界	不移動衆生	今多億衆生
皆住菩提道	衆生及菩提	從無分別生

能知此平等 是名阿羅漢 一切法等中
此法等最上 此等及菩提 從無分別生
知已爲他說 而無有增減 亦從此法生
故名阿羅漢 應爲此衆生 說無音聲法
解脫多衆生 而無有動者 衆生不可得
及斷常二邊 爲除諸邪見 令得脫衆苦
著諸法生滅 無爲無作相 諸苦惱衆生
以想而分別 不毀壞於色 於受亦復然
想行及與識 令離此諸著 於此凡夫法
而見有移動 住佛法不住 皆令得解脫
住於諸果想 緣覺想亦然 爲衆生說法
令離佛想著 著於菩提心 著施亦復然
著於戒忍者 爲說無著法 取於懈怠想
分別行精進 定心與亂心 惡行及妙慧
不分別此法 知無種種相 應當如是說

是名阿羅漢 堅著於我想 聲聞多分別
爲除分別故 應爲彼說法 父母及妻子
無慧故貪著 非道非菩提 是生死所行
此是我兄弟 姊妹愛念心 除彼貪愛著
是名阿羅漢 故作巧談說 發他喜勇心
生意欲得見 先舊諸所親 若得相見時
展轉生愛著 無知顛倒故 屬魔不自在
遠離諸利養 知利養過患 應爲諸衆生
說諸利養過 此是煩惱法 此是出要法
不著此二見 是名阿羅漢 貪著於利養
而不能自解 能除彼著故 是名阿羅漢
此是在家法 此是出家行 凡小起分別
應爲解彼著 於一切法中 而見有卑勝
著是器非器 應解如是著 遠離凡夫法
而緣於佛法 應爲彼說法 離得不得著

小大非堅法 如是甚衆多 應當爲解著
 衆生如是想 能生衆相好 其事亦衆多
 唯有調柔者 能除彼想著 諸佛妙世界
 興起修淨心 著彼世界想 應當爲除却
 涅槃非涅槃 能生不能生 此行菩提道
 此不求菩提 惡戒及善戒 有福及無福
 愚智諸衆生 而作種種想 如是諸衆生
 多作種種想 爲除此想故 應爲彼說法
 此是良福田 此非良福田 分別愚智法
 其事亦衆多 取著於女想 亦復分別男
 是聖是非聖 分別起二見 衆生無慧心
 起於此二見 著此二見者 應當爲除斷
 退轉不退轉 有記及無記 此近於菩提
 此不近菩提 已逮於菩提 畢竟般涅槃
 行如是諸相 分別於涅槃 唯有調柔者

除衆生是想 是名阿羅漢 亦名除想著
 此是菩薩法 說名阿羅漢 若見此本緣
 知是阿羅漢
 如是阿難如來等正覺以方便力爲聲聞人
 說菩薩摩訶薩名阿羅漢復次阿難云何如
 來說菩薩摩訶薩名爲聲聞阿難當知菩薩
 摩訶薩以佛法聲不可思議法聲寂靜菩提
 法聲無戲論法聲無垢清淨法聲令無量無
 邊不可計衆生聞故名爲聲聞復以涅槃是
 無比安樂法聲念處正勤神足根力覺道法
 聲令多衆生速能勤求名爲聲聞說此身空
 非堅固法堅固不可得凡夫愚小貪著此身
 爲解說聲又說眼入所見虛妄應生佛眼不
 可思議佛法眼以佛眼故今多衆生無愚惑
 聲又說諸法無生相聲名爲聲聞又說音聲

其喻如響不應於聲而生染著無有聞者亦無說者於香不生嗅想無嗅香者如人夢中嗅衆多香實無有香亦無嗅者以顛倒故起嗅香想此香猶如夢法而不可信亦無牢固說是法聲名為聲聞復說舌入猶如肉段不

髮八

二十

能知味如此肉段猶如聚沫實無所有如是味想不可思議味界無心離諸心法不應生心知心是不住相說如是法聲令衆生聞名為聲聞又於此法了了現見如其所見能宣說聲又說此身空無性相以無相故不生亦無所生為多衆生說是菩提法聲名為聲聞復說意入空無所有亦無自性其猶如幻不生不滅說是法聲名為聲聞又說不可思議法施此法能得菩提菩提不可思議法施亦不可思議能生不可思議菩提所以者何如

其種子果實亦然此中無果以音聲故說果復說財施下劣法施最勝除却慳心無所分別不生施想猶如幻師於所幻事無所分別如是以無分別心而行布施能生菩提說是法聲名為聲聞此聲離一切說息諸煩惱過

諸言說離諸染著以是音聲為諸衆生宣說

佛法所以者何此音聲一切音聲中最上以

是音聲宣說佛法此聲不可破壞亦無所依

從無二無別生如其所生說無二無別佛法

是故阿難菩薩摩訶薩以如是法聲令衆生

髮八

二十二

聞名為聲聞爾時世尊欲重宣此義而說偈

言

以不可思議 最上佛音聲 令多衆生聞

菩薩為聲聞 能為多衆生 說菩提寂滅

清淨無戲論 是名為聲聞 宣說涅槃樂

其樂無有比 亦說寂滅相 是名為聲聞
 說念處正勤 根力及覺道 速生此法故
 是名為聲聞 宣說此身空 堅牢不可得
 為諸凡小者 顯說是身相 又說於眼入
 所見皆虛妄 無智諸眾生 於此生染惑
 應生於佛眼 難思平等眼 於無生法中
 亦不生惑著 知聲猶如響 解耳亦復然
 此中無聞者 亦復無說者 以無聞說故
 不生於染著 宣示諸眾生 是名為聲聞
 如人於夢中 嗅種種諸香 但依顛倒起
 而實無所有 應如是知鼻 不能嗅彼香
 為顛倒眾生 菩薩宣說是 說舌是空無
 肉段不知味 若肉能知味 手觸時應知
 宣說如是相 味想多過患 當知此味界
 是不可思議 菩薩無所依 能現見了了

宣說現見法 是名為聲聞 宣說如是身
 空無有性相 空無性相故 不生無所生
 菩提亦如是 不生無所生 為多眾生說
 故名為聲聞 說意入性相 其實無所有
 說無所有法 故名為聲聞 宣說布施法
 法施難思議 此施能出生 無上佛菩提
 財施為下劣 法施為最勝 能除貪慳心
 得至菩提果 離諸宣說聲 息諸煩惱聲
 離諸染著聲 無垢清淨聲 最上微妙聲
 其聲性寂靜 以此寂靜聲 說難思佛法
 此聲不可壞 亦復無所依 說無二無別
 故名為聲聞 以如是音聲 宣說諸佛法
 隨音聲而說 而求菩提道 常為他宣說
 嚴淨佛世界 無上導世師 諸佛所住處
 說此三千界 如虛空而住 如空諸眾生

皆同涅槃相	所說四十四	令衆生差別
皆悉如虛空	不思無分別	此界亦如是
莫生堅固想	此中無生死	無煩惱可滅
此中無法生	亦無有衆生	此皆寂靜故
無有見生者	恒爲衆生說	晝夜不斷絕
而不生是念	我爲衆生說	聲聞如是知
亦爲衆生說	無聞能聞故	是名爲聲聞
其心意勇猛	宣說最上法	若能知此法
亦知諸法如	聲聞說如是	無染無有漏
亦爲多衆生	說無染著法	若知無染著
清淨無戲論	於諸佛法中	欲觀不能見
諸佛所說法	遠則不可見	近亦復無有
而能得見者	聲聞說是法	今多衆生信
安住是法中	故名爲聲聞	阿難以是事
我說是聲聞	當知是聲聞	是無依菩薩

是故阿難髮八如來等正覺以方便力爲聲聞人說菩薩摩訶薩名爲聲聞復次阿難云何如來說菩薩摩訶薩名辟支佛阿難當知菩薩摩訶薩於一切法現見了了以現見了了故能知聖法而於諸法不增不減覺一切法無有增減現見了了名辟支佛覺知一切不可思議法覺知一切衆生等同涅槃而不可得不生不滅不生不滅故即是實際照涅槃際衆生際一切諸法無所有際稱名字際不可言說際不依言說不可以言說說所以者何言說法空不得自在言說不能知衆生際及與法際現見了了覺知此際名辟支佛現見色陰以言說故名爲色陰而此色陰無有言說離言說故但以言說名爲色陰此中無我所所以者何言說說者此二皆空不得自

在不生不滅言說無知云何能說此是色陰
受想行亦應如是了了現見現見識陰以言
說故名爲識陰而此識陰無有言說離言說
故但以言說名爲識陰此中無我我所所以
者何言說說者此二皆空不得自在不生不
滅言說無知云何能說此是識陰於此五陰
言說諸緣了了現見名辟支佛所以者何此
陰言說諸緣此緣無緣非緣能知阿難是菩
薩摩訶薩名辟支佛爾時世尊欲重宣此義
而說偈言

現見一切法 知聖法亦然 無諍不可壞
畢竟無有相 現見一切法 其性相自空
若知自性相 畢竟無所有 已逮此現見
與彼法無異 是名爲正覺 難思辟支佛
衆生如涅槃 其始不可得 無始無終際

是名爲實際 衆生如涅槃 畢竟無有生
若法無有生 說名爲涅槃 衆生如涅槃
亦有諸照用 照用無有我 故名爲涅槃
衆生如涅槃 立種種名字 不生亦不滅
以言說故說 言說性是空 言說無所知
以無所知故 衆生是涅槃 言說不自在
無我無有心 以言說無性 畢竟無所有
言說不依際 亦復無所住 言說所說者
難思衆生際 衆生際涅槃 不思議實際
安隱無戲論 最勝歸依處 猶如電光際
即是衆生際 無緣無處所 不思議實際
一切法邊際 無有衆名字 以名字名故
其際不可得 實際不可名 亦無能知者
衆生際無我 當知此際空 言說不依際
言說無所宣 若能了知此 無有衆生際

言不自在空 言不知諸際 言說所言者
難思衆生際 如是等諸際 自然能覺了
是名爲正覺 難思辟支佛 現見於色陰
以名字故說 此陰無言說 常離言說故
遠離於所知 所知名計壽 能知此所知
而無有住處 ^{髮八} 所說名色陰 ^{字五} 色陰無有我
言不自在空 畢竟無生滅 所言說言性
畢竟無所有 以無所有故 能說名色陰
受想亦如是 行識亦復然 以無有言說
說是五陰名 此陰不可說 亦復不可斷
不生亦不滅 無處非無常 非煩惱出要
非報亦非業 非取亦非捨 非戲論寂滅
亦非奢摩他 非毘婆舍那 非多欲知足
非懈怠精進 非掉亦非悔 亦無有增減
不得所生法 而可以爲戒 不修無分別

宣說無分別 無怖無有諍 無縛亦無解
以此入言說 言說無所入 言說及說法
無言說而說 自能逮現見 說法無窮已
依如三昧 不著諸言說 有此現見智
知言說平等 如言說諸法 以無言說說
以逮此現見 更不復隨他 是名爲正覺
難思辟支佛
復次阿難菩薩摩訶薩現見無明及無明行
非生相知識自性知名色自性知六入自性
知觸自性知受自性知愛自性知取自性知
有自性知生自性知老死自性於此法中了
了現知名辟支佛爾時世尊欲重宣此義而
說偈言
現見於無明 畢竟不能生 猶如水中影
終始無所有 明見一切法 而無動搖相

若見法如是	是故名爲明	明性如虛空
一切法皆爾	若得此現見	是名辟支佛
如說此身行	而不在於內	亦不在於外
此身行不生	身行如芭蕉	畢竟不堅固
不生亦不滅	其性如虛空	無畏諸菩薩
若得此現見	是名爲正覺	難思辟支佛
了知一切法	其性常如幻	亦能深信解
識無所有性	觀察如此識	所行虛妄法
以有此智故	能知識性空	已知智非智
一切處無染	若知如是法	識則同於幻
如說諸名色	無受不可說	而知其性相
畢竟無所有	能說諸入性	而無有取相
能如是知入	此是性空故	觸性無不在
住於諸入中	觀察此觸時	如幻無所有
觸性本自空	分別故能知	而無諸觸性

住處無方所 若能現見觸 智者能遠離
有慧遠離觸 是名辟支佛 能知受相空
受亦無自性 如泡不牢固 畢竟無所有
已斷一切愛 通達無愛法 已到愛盡處
是名辟支佛 知取無所取 亦知是空無
不生無所有 如熱時焰水 本來諸有想
及本有生想 若知此性相 畢竟無所有
已離一切老 更不復受死 而於一切處
不復更受身 已逮此現見 而無有所依
以辟支佛名 宣說諸菩薩

如是阿難如來等正覺以方便力爲聲聞人
說菩薩摩訶薩名辟支佛如是阿難諸佛如
來說菩薩摩訶薩名爲堅信堅法八人須陀
洹斯陀含阿那含阿羅漢聲聞辟支佛爾時
尊者阿難便說偈言

自在導世師 不可說而說 於空中作結
即空而解之 佛有大方便 說無著法者
於不可說法 而能分別說

廣博嚴淨不退轉法輪經卷第二

廣博嚴淨不退轉法輪經卷第三

髮九

劉宋涼州沙門智嚴共寶雲譯

爾時阿難白佛言世尊一切世間必生疑惑不能解了如來等正覺以何緣故說堅信堅法乃至辟支佛耶爾時世尊告阿難言阿難當知若有衆生於先佛所造衆善行能解如來密語不生疑惑所以者何能知如來密語如幻如熱時焰如夢所見如影如響阿難若如是知密語者不生疑惑是故阿難菩薩摩訶薩於如來等正覺密語應如是知若有勤行精進不得精進勤修智慧不得智慧者不生疑惑爾時世尊欲重宣此義而說偈言
諸佛導世者 微密語難知 爲發大莊嚴
無異菩薩說 懈怠無智者 不能解密語
應當勤精進 爲解密語故 如幻焰夢見

如電亦如響 以言說顯現 如是等諸法
如是知諸佛 所說微密語 能以如是慧
照淨微密智 不應如是知 菩提可宣說
應如是覺知 無言說故空 空不能知空
空不分別空 斷一切分別 顯示如是空
虛空無所取 亦無有所捨 以無取捨故
是故知法空
佛告阿難若如是知有爲法皆悉如夢而不放逸者不生疑惑說是法時五億比丘生堅信想者即從座起整衣服偏袒右肩右膝著地一心合掌皆共和合住於佛前而說偈言
今日牟尼尊 除我等疑心 得解微密義
以信求菩提
復有五億比丘生堅法想者從諸比丘聞此偈已即從座起乃至合掌住於佛前而說偈

言

今蒙菩提照 除我等疑冥 得解微密義
堅法求菩提

復有十億比丘生八人想者從諸比丘聞此
偈已即從座起乃至和合住於佛前而說偈

聖九

言

先住八地心 今日皆除捨 得解微密義

八人求菩提

復有十一億比丘生須陀洹想者從諸比丘
聞此偈已即從座起乃至和合住於佛前而

說偈言

今於佛法中 得斷諸疑網 解佛微密語

宣說須陀洹

復有二萬五千比丘生斯陀含想者從諸比
丘聞此偈已即從座起乃至和合住於佛前

而說偈言

我等本染著 志樂斯陀含 今皆得離著
寂滅無戲論

復有五百億比丘生阿那含想者從諸比丘
聞此偈已即從座起乃至和合住於佛前而

說偈言

今遭救世尊 遠離諸戲論 得菩提光照

求拔諸果想

復有三萬五千億得四禪比丘生阿羅漢想
者從諸比丘聞此偈已即從座起乃至和合

聖九

三

住於佛前而說偈言

我已離煩惱 通達無異法 知諸乘平等

皆悉如幻法

復有二萬比丘生聲聞想者從諸比丘聞說
偈已即從座起乃至和合住於佛前而說偈

言

離縛牟尼尊 止我等虛說 密說聲聞義

我今皆通達

復有五千比丘生辟支佛想者從諸比丘聞此偈已即從座起乃至和合住於佛前而說

偈言

我等今現見 辟支佛所行 解佛微密義

難思辟支佛

有一萬比丘尼生須陀洹果想斯陀含果想阿那含果想阿羅漢果想者從諸比丘聞說

偈已即從座起乃至和合住於佛前而說偈言

言

今 平等法 永斷女身分 佛無有異言

必成人中尊

復有八萬八千優婆塞生須陀洹果想斯陀

含果想阿那含果想者從諸比丘聞此偈已

即從座起乃至和合住於佛前而說偈言

我等心無垢 如淨毗瑠璃 爲修佛法故

今日當出家

爾時虛空中有六十億那由他諸天以天曼

陀羅華而散佛上散已而說偈言

本有諸乘想 亦有諸果想 今日悉除捨

必當成菩提

爾時有百千阿羅漢舍利弗大目犍連須菩

提阿泥盧豆離婆多劫賓那等即從座起整

裝九

衣服偏袒右肩右膝著地一心合掌皆共和

合住於佛前而白佛言世尊我等今日志願

滿足能降伏魔摧諸怨敵具足成就五無間

業我等今日滿足成就五欲功德我等今日

邪見具足遠離正見我等今日害多百千衆

生之命我等今日已逮菩提即於今日無餘
涅槃而般涅槃爾時世尊默無所說爾時會
中有百千衆生皆生疑惑我等今者在闇
中云何諸大羅漢作如是語何況凡夫以疑
惑故不能從此至彼從彼至此坐不能立立
不能坐爾時尊者阿難知此百千衆生心之
所疑亦以佛神力故問文殊師利法王子言
今此大衆百千衆生聞諸大德比丘作如是
語皆生疑惑世尊默然而無所說願文殊師
利說其因緣此諸大德比丘以何因緣說此
密語爾時文殊師利法王子語尊者阿難言
阿難當知此是不退轉菩薩地事唯有不退
轉菩薩乃能證知此諸大德比丘密語尊者
阿難問文殊師利言此諸大德比丘皆是不
退轉菩薩耶文殊師利言如是如是此諸大

德比丘皆是菩薩髮九已於菩提得五不退轉阿難
請文殊師利言願說諸大德比丘微密語義
文殊師利言無明能生生死是故名母斷無
明故名爲害母父名不正思惟及以喜愛彼
已永斷名爲害父以諸法不可壞方便壞衆
多想亦壞諸行名爲壞僧應壞凡夫法名阿
羅漢以不滅方便滅羅漢想名殺羅漢以不
滅方便滅如來想名出佛身血如是等想已
斷已害畢竟無餘阿難以是事故諸大德比
丘作如是語我等今日具足成就五無間業
所以者何於此法中不聚不散不減不滿是
故名爲五無間業滿足成就阿難當知彼作
是說我等今日滿足成就五欲功德者彼諸
比丘於此五欲了知如夢如幻如熱時焰如
影如響彼於此智滿足成就而於五欲無增

無滅所以者何能知此法畢竟而無所有以
無所有故能如實知而於彼法得如是忍故
名滿足成就五欲功德阿難以是事故彼諸
比丘作如是說我等今日滿足成就五欲功
德阿難當知彼作是說我等今日滿足成就

邪見遠離正見者彼諸比丘知諸法邪見諸
法邪阿難邪名有爲諸法皆是虛妄此虛妄
法猶如虛空法猶如虛空不增不減亦不住
方亦無所屬所以者何離自性故彼知是法
皆悉平等以平等故正見亦等彼已遠離如
是等想所以者何若有等想有不等想彼諸
比丘無有等想及不等想所以者何諸佛之
法離一切想彼於佛法通達無生不得無生
法是故阿難彼諸大德比丘作如是語我等
今日具足成就邪見遠離正見阿難當知彼

作是說我等今日害多百千衆生命者阿難
彼諸比丘今此時會百千衆生諸天及人知
有爲法皆悉如幻如影如響知此法故離衆
生想離壽想人想離一切法想以一切法不
可種方便種菩提善根諸比丘比丘尼優婆

塞優婆夷從諸比丘聞是密語亦得離衆生
想壽想人想不數數生死所以者何若著衆
生想壽想人想則數數生死彼已遠離如是
法故畢竟不生是故阿難彼諸比丘作如是
說我等今日害多百千衆生命根阿難當知
彼作是說我等今日已逮菩提於無餘涅槃
而般涅槃者阿難彼諸比丘令此大衆百千
萬億那由他諸天及人即於今日得離煩惱
得逮菩提所以者何此諸大衆皆發阿耨多
羅三藐三菩提心而於今日聞說金剛句法

皆得無生法忍得見菩提以是事故而作是說我等今日逮得菩提我等今日於無餘涅槃而般涅槃者彼不斷煩惱不修佛法無餘煩惱是故阿難彼諸比丘作如是說我等今日已逮菩提於無餘涅槃界而般涅槃言今日者阿難當知即於此日不生亦無所生故名今日

天竺正音不生與今日音同也

是故阿難求菩薩乘若善男子善女人發阿耨多羅三藐三菩提心者於一切法應當漸損以不可得法發菩提心於一切法是名為出離菩提相於一切

法是名為入無餘涅槃而般涅槃阿難求菩薩乘族姓子不應染著日相不應以日而生畫想阿難愚小之人以日為畫想無點慧故所以者何若今此畫是真實是堅牢是常住者應有積聚不應過去唯應有畫不應有夜

阿難當知有晝夜想者此是凡小是故阿難求菩薩乘族姓子有深心者為善知識所護不應生晝夜想所以者何求離一切想菩提道故爾時文殊師利法王子欲重宣此義而說偈言

無明名為母	能生生死故	已拔其根本
是故名為害	不正觀思惟	喜愛名為父
彼皆如實知	畢竟無所有	以知無所有
而害其根本	不緣無所有	是故名為害
所說羅漢法	及與凡夫法	彼已以智壞
是故名為害	所有眾多想	以知其性相
以不可壞法	壞想名為僧	本來所分別
如來諸法想	彼以斷遠離	知其不生滅
此想次第起	思量知是空	如所說平等
彼已能證知	所說欲功德	其名有五種

遠離此諸想 知想皆如幻 是諸比丘等
於欲無增減 於導世師前 而作如是說
知欲性皆空 猶如夢所見 畢竟無有生
於此智得滿 以邪智知法 虛僞不牢固
邪名爲虛妄 於此智得滿 有爲法虛妄
而無有近遠 ^{髮九} 無知無近遠 如五指摩空
彼說諸正見 皆見是平等 如諸法平等
知見等亦然 凡小多分別 衆生想故死
若不得衆生 亦無有死想 有緣諸衆生
除其計壽想 知計壽過患 除其如是想
遠離衆生想 及與計壽想 彼作如是說
害多衆生命 已遠離死想 達無分別法
知不壞菩提 不增無果報 生死不可取
覺了清淨法 一切法無諍 不生常寂滅
不應分別晝 亦不分別夜 於不來去法

而求於菩提 凡小恒分別 以日用爲晝
欲求菩提者 莫作是分別 彼以是密語
宣說如是法 以知此法故 能作如是說
文殊師利法王子說此偈已爾時會中百千
衆生已拔疑箭無復疑惑逮大照明於諸法
中得無生法忍各自脫身所著上服以奉文
殊師利法王子皆作是言願使我等於未來
世說此妙法覺悟衆生如今文殊師利法王
子覺悟衆生爾時世尊告文殊師利言善哉
善哉文殊師利除衆生疑照明佛法法應如
是爾時阿難白佛言世尊今此百千衆生所
有疑箭非是世尊所拔斷耶佛告阿難今此
百千衆生皆是文殊師利本所教化成就菩
提聞彼說法皆能信解阿難白佛言是諸衆
生皆於菩提不退轉耶佛告阿難如是如是

是諸衆生已於菩提而不退轉所以者何爲
文殊師利善知識所護念故爾時阿難白佛
言世尊此諸比丘生堅信想生堅法想生八
人想生須陀洹想生斯陀含想生阿那含想
生阿羅漢想生聲聞想生辟支佛想者皆於
菩提不退轉耶佛告阿難是處難信樂小法
者懶惰懈慢不勤精進貪著飲食貪著欲染
親近樂行染欲法者好喜談說無益之語亂
心失念不具威儀心意躁擾不攝諸根輕躁
嬉戲愚很多語如是衆生信是法難阿難著
增上慢不能護身貪著身命遠閑居處捨多
聞法破戒憍慢毀法竊法不尊重法毀滅正
法貧窮法財喜樂非法誹謗正法樂行非法
不知恩報恩不敬佛法僧阿難如是衆生信
是法難慳心堅著惡戒瞋心不解佛法成就

惡法貧窮智慧惡友所護遠離善友不爲般
若波羅蜜所護不爲諸陀羅尼經王所護起
有得見深重利養貪著衣鉢於衣鉢物極生
重心不尊重和尙阿闍黎於初夜後夜不勤
行方便阿難如是衆生信是法難殺生偷盜
邪淫妄語兩舌惡口說非時語貪瞋邪見親
近邪見修行廣布邪方便法無慚無悔朋黨
交遊獨行無伴離沙門法行非沙門法不信
空無相無作無爲不生不滅一切諸法非破
壞相阿難當知如是衆生信是法難爾時世
尊說是語已即便默然爾時阿難承佛威神
問文殊師利法王子言文殊師利世尊何故
默無所說文殊師利言將來惡世衆生成就
如是惡不善法不能信解如是深法以是事
故世尊默然尊者阿難問文殊師利言來世

衆生少有信解如是法不文殊師利言來世衆生信此法者甚少猶如衆生不識珍寶者多識者甚少所以者何非其智力所及阿難衆生亦爾聞說此法信解者少設有信解如是法者不爲國土城村人民所敬國土人民咸共輕賤而遠離之所以者何此人先世作法留難業因緣故今受此報阿難請文殊師利言唯願爲此少信解衆生敷演此義文殊師利言此事問佛佛當演說爾時阿難即便問佛爾時世尊四面顧視即出舌相遍覆三千大千世界於其舌相復放光明遍照十方恒河沙世界皆令周遍時四部衆佛神力故皆見十方恒河沙諸佛世界諸佛世尊皆說是法悉得聞知聞是法已皆共和合勸請世尊唯願如來宣說是法莫令斷絕世尊今十

方諸世界中無量無邊不可限量諸佛世尊宣說是法我等悉得見聞其所說法無有增減如今世尊等無有異爾時世尊還攝舌相告阿難言汝頗曾見不實語人有是廣長舌相不耶阿難白佛言無也世尊此是世尊誠實說于戒定忍辱憐愍饒益慈悲喜捨一切智果所得舌相是故世尊唯願爲此少信衆生族姓男女敷演此義因是事故諸不信者以此證知皆令得信爾時世尊告阿難言今此四衆諸來會者比丘比丘尼優婆塞優婆夷天龍夜叉乾闥婆阿脩羅迦樓羅緊那羅摩睺羅伽人非人等聞說此法者皆於阿耨多羅三藐三菩提不退轉漸次修行當得阿耨多羅三藐三菩提即於此處宣說是法無有增減如我今日等無有異爾時四衆比丘

比丘尼優婆塞優婆夷天龍夜叉乾闥婆阿
脩羅迦樓羅緊那羅摩睺羅伽人非人等皆
大歡喜踊躍無量其中或有以衣散佛者或
以華者或以諸髮所謂須摩那髮金髮銀髮
毗瑠璃髮玻瓈髮磲磬髮碼碯髮珊瑚髮日
光寶髮雜七寶髮以如是等髮而散佛上諸
天以曼陀羅華摩訶曼陀羅華波流沙華摩
訶波流沙華曼殊沙華摩訶曼殊沙華迦迦
勒羈華摩訶迦迦勒羈華盧遮摩禰那華摩
訶盧遮摩禰那華輸婆摩禰華摩訶輸婆摩
禰華如是等諸華而散佛上復以天優鉢羅
華波頭摩華拘物頭華芬陀利華而散佛上
於虛空中作天妓樂種種歌頌讚歎佛德諸
龍王等皆雨真珠散於佛上一切女人即脫
身上妙好瓔珞以散佛上脫身上服以用奉

佛即整衣服右膝著地一心合掌住於佛前
皆共和合而作是言諸佛如來言無有二智
無障礙記說我等必當作佛爾時世尊告阿
難言如是阿難是諸女人必於阿耨多羅三
藐三菩提不退轉所以者何諸佛世尊永斷
愚癡貪欲瞋恚及諸憍慢塵垢黑闇一切染
著燒然煩惱永盡無餘成就精進成就諸力
威德尊嚴神足自在光明照曜眷屬成就尊
貴威勢色族姓處悉皆具足相好具足光明
具足到安隱處如釋如梵如欲界中尊威儀
具足戒行具足觀察具足天龍夜叉乾闥婆
阿脩羅迦樓羅緊那羅摩睺羅伽人非人等
皆共尊重恭敬讚歎不染世法永捨一切諸
有爲法成就解脫諸佛之法見聞不虛阿難
白佛言世尊云何諸佛世尊聞不虛耶佛告

阿難汝不知耶阿難白佛言世尊實所未知
唯願說之云何如來聞不虛耶佛告阿難一
心善聽吾今解說阿難當知若有衆生已聞
今聞當聞釋迦牟尼佛名者是諸衆生皆於
阿耨多羅三藐三菩提不退轉所以者何諸
佛菩提無虛妄故亦無貪欲及以瞋恚阿難
何況今日現於我前能以一華散我上者若
有衆生我泥洹後形像舍利能持一華以供
養者如是衆生亦於阿耨多羅三藐三菩提
不退轉阿難白佛言若有畜生聞釋迦牟尼
佛名者皆於阿耨多羅三藐三菩提不退轉
耶佛告阿難若有畜生聞釋迦牟尼佛名者
是諸畜生皆種阿耨多羅三藐三菩提種子
因緣所以者何諸佛如來其有聞者聞必不
虛是故諸佛如來言無有二阿難譬如尼拘

陀樹枝葉茂盛能蔭百人至五百人阿難於
意云何其樹種子爲大小耶阿難白佛言世
尊其子甚小佛告阿難是尼拘陀樹種子雖
小得地水火風虛空衆緣故而得生長漸次
廣大如是阿難彼諸衆生種菩提種子漸次
增長當成阿耨多羅三藐三菩提而不腐敗
不可毀壞所以者何以不住一切法作種子
故而不腐敗亦無毀壞爾時阿難白佛言世
尊爲是諸佛本願之力爲是諸佛法應爾耶
佛告阿難是我本願若有聞我名者必不退
轉阿耨多羅三藐三菩提亦是諸佛法應如
是所以者何一切諸佛法皆等故阿難白佛
若諸佛法等以何緣故立誓願耶佛告阿難
諸佛世尊宣說法時會中諸菩薩摩訶薩聞
佛說法即立誓願使我將來成佛說法見聞

不虛亦復如是爾時阿難白佛言甚奇世尊成就如此希有之法復以此法利益衆生佛告阿難如是如是如汝所說我爲利益諸衆生故遍諸佛土供養諸佛不惜身命捨一切物無有慳悋勤修精進積集難得無所依倚

要九

十

菩提之道於一切法而無所取以攝衆生爾時阿難白佛言世尊甚爲希有魔王波旬聞說此法不作留難佛告阿難以不聞故不作留難所以者何文殊師利法王子以神力隱蔽令不得聞故無留難爾時文殊師利法王子還攝神力惡魔波旬即於夢中聞說新異不退轉輪法亦聞稱釋迦牟尼佛名即便驚寤愁憂恐怖身毛皆豎即從牀上自投於地作如是言先所降伏今不伏我先所領土今不屬我愁憂苦惱發聲啼哭以愁憂苦惱發

聲啼哭故身形老瘦猶如百歲老人爾時惡魔波旬將四種兵及三千大千世界所有魔天來詣佛所猶如菩薩坐道樹時魔嚴兵衆來詣佛所亦復如是爾時惡魔波旬身形老劣如百歲人頭低脊僂行步遲重喘息短氣

舉身戰掉扶杖而行來詣佛所當魔波旬來詣佛時於虛空中所將眷屬四種兵衆聞說不退轉輪法亦聞釋迦牟尼佛名時四種兵及諸眷屬自然而住不能得前生如是念我等不復隨從波旬爾時波旬單獨羸老白佛

要九

十五

言乃至不留一人扶接我者本降伏者今不伏我先所領土今不屬我世尊憐愍一切衆生我今亦在衆生數中而不垂憙乃至不留一人授我水者爾時世尊告波旬言衆生界多是無盡法波旬當知假令日日恒河沙等

諸佛出世一一諸佛於日日中度恒河沙衆生今般涅槃而衆生界猶不可盡時魔波旬復白佛言衆生界雖不可盡如我今者單獨羸老在道行時若其顛蹶乃至無有扶接我者唯願世尊安慰我意令我歡喜速得還去佛告波旬且安意去若有衆生不信不解不退法者是諸衆生皆屬於汝是汝眷屬汝得自在一切皆是扶接汝者爾時波旬聞是語已歡喜踊躍作如是言我今當爲衆生作諸留難今於此法不信不解生於疑惑生疑惑故當屬於我得自在爾時波旬復白佛言唯願世尊重安慰我令我歡喜而得還去佛自說言若有衆生聞我名者皆於阿耨多羅三藐三菩提而不退轉從今已往更莫復說所以者何若有衆生聞此語已勤行精進求

佛菩提爾時世尊告波旬言汝安意去我當令諸衆生乃至無有住菩提者亦復無有出衆生界者無有衆生離色陰者離受想行識陰者波旬且安意去我當令諸衆生無有離身見者離戒取見者離有所得者離六十二見者離過去未來現在想者離殺生者離不與取者邪淫者離妄語綺語者惡口兩舌者離貪恚邪見者波旬且安意去我不教衆生而行布施持戒忍辱精進禪定智慧亦不教衆生行四攝法不令衆生離衆生想離慳著想離父母想離兄弟姊妹男女想離晝夜想離半月一月一年想離布施持戒忍辱精進禪定智慧想菩提心想力無畏想根力覺道想佛法僧想障菩提想一切種智想波旬汝且安意去我當令衆生於一切法無遠離想

變九

十六

爾時波旬歡喜踊躍拔愁憂箭即於是處還復本形以諸天華而散佛上遶佛三匝住於佛前而說偈言

今日兩足尊 說此微妙音 佛無有二言 令我大歡喜

時魔波旬說此偈已歡喜安意漸離佛去還本天宮皆共和合受五欲樂以自娛樂更不復生留難之心說此降伏遣魔法時大地六種震動阿難白佛言世尊以何因緣大地震動佛告阿難說此降伏遣魔法時六萬四千

菩薩於諸法中得無生法忍阿難白佛言世尊今此會中頗有疑惑是法者不佛告阿難今此會中有十億衆生皆生疑惑心意迷悶作如是說爲是何語將非我等謬錯聞耶以是事故不知時方亦不自知從何所來欲至

何所以疑惑故各不相見阿難白佛言唯願世尊以慈悲心爲此衆生速作照明莫令此衆懷疑惑故墮於惡道以何因緣而作是說惡魔波旬且安意去我不令衆生住於菩提乃至波旬且安意去我不令衆生於一切法無遠離想唯願世尊爲此衆生速作照明亦令將來衆生逮照明故受持此法而不忘失願分別說爾時世尊便說偈言

菩提無住相 亦無能住者 是故說衆生 無住菩提者 菩提與衆生 無二無有異 是故說衆生 無住菩提者 亦無有衆生 能離衆生界 無所有不生 畢竟不可得 難思衆生界 其性本自空 假令一切智 不見其離相 我所說諸陰 無衆生能離 此陰與衆生 無異常寂滅 已知陰是空

而不離其性 說其體是一 不可取而離
 已能知諸陰 不取不可離 無我無自性
 畢竟無所依 諸陰如虛空 陰所行亦爾
 行無所行故 說陰如虛空 如說虛空界
 非生非能生 陰性亦如是 無有能離者
 身見自性相 無法而可得 以不可得故
 我說不可離 疑無有自性 畢竟不可得
 以不得疑故 衆生無能離 無有諸衆生
 能持選擇戒 見取諸衆生 亦復不可得
 計有得法者 衆生不可得 有得法無心
 不離於自性 如所說諸見 凡有六十二
 如是等諸見 皆如水中影 已知此諸見
 皆如水中影 無我無所有 自性不可得
 過去未來想 及以現在想 此想無所有
 亦如水中影 此想無有我 衆生不可得

以不得衆生 是故不可離 殺害諸衆生
 必趣險惡處 安置涅槃中 無有能動者
 衆生若可得 可有離動相 衆生無有實
 故說不可離 菩提名不與 未會有與者
 雖勤作方便 而無動離者 不行施衆生
 教行勝法施 雖勤作方便 而無動離者
 亦不得衆生 依倚姪欲者 欲中無有邪
 可與非邪合 妄語諸衆生 有緣者應化
 雖勤作方便 而無動離者 兩舌與惡口
 及與非時語 如是等言說 如響令人惑
 此法無處所 亦不可染著 此諸聲如響
 知其無所依 本所有無明 深計著於我
 以知我真實 無能動離者 亦能知瞋恚
 畢竟無有相 菩提無相故 無能動離者
 若能知邪見 是名爲正見 以過著見法

無能動離者 不教諸衆生 而以女色施

賢聖所禁制 是施有過患 邪見所持戒

聖道所捐棄 智者不應教 以此求聖法

外道所稱讚 種種諸忍相 此忍非正道

令人到涅槃 外道所稱讚 五熱精進法

不能至菩提 智者應捨離 外道諸禪定

盡行諸有相 非諸佛所讚 是以不教他

不用世俗慧 教化諸衆生 此慧不能得

不思議佛慧 於清淨衆生 成就無畏者

我說於是衆 不行四攝法 深敬念佛者

不教離是著 佛有無染著 亦無諸障礙

深敬念法者 不教離是著 離欲最勝法

云何而可離 不著衆生想 而發菩提心

菩提不可著 云何而可離 父母及兄弟

姊妹男女想 此想皆如幻 云何而可離

此想一切處 無法無所有 無法無有故

云何而可離 晝想及夜想 半月一月想

此想無真實 如熱時焰水 施想與戒想

忍辱精進想 此想非真實 云何以想離

定想及慧想 菩提之心想 力無畏諸根

是想皆虛誑 諸覺及道想 佛想與法想

皆從無知起 云何離是想 分別諸僧想

此想亦衆多 從分別起故 我說不可離

不著菩提想 及一切智想 此想遠諸佛

不思議菩提 以是故我說 波旬無智人

不離此諸想 而遠求菩提 諸法及菩提

皆悉知如如 宣說不離義 去魔憂惱心

世尊決定說 此降伏遣魔法時會中十億衆

生拔猶豫箭無復疑惑逮大照明於諸法中

得無生法忍會中十億衆生皆共和合住於

佛前而說偈言

不思議佛道 今我已證知 佛是導世師

除斷我疑心 已逮大照明 安住佛法中

諸方明淨故 得見一億佛 亦得見其法

知色等不生 遭遇救世師 得淨如是智

亦得見一億 諸佛嚴淨土 無上導世師

皆悉住其中

爾時十億衆生說此偈已脫身所著上妙之

服以供養法故歡喜奉佛作如是言願令此

法流布一切衆生皆得耳聞爾時阿難白佛

言世尊若有衆生聞是降伏遣魔法者能信

能解不生疑惑者是善男子善女人得幾所

福佛告阿難若善男子善女人聞是降伏遣

魔法一經耳能信能解不疑惑者功德甚多

不可限量阿難白佛其所得福可以方喻知

不佛告阿難若善男子善女人於日初分供

養百千諸佛於日中分供養百千諸佛於日

後分供養百千諸佛尊重讚歎以上妙房舍

一切所須皆悉充足經百千劫是善男子善

女人所得功德寧爲多不阿難白佛言世尊

甚多甚多不可限量難以喻知佛告阿難若

善男子善女人聞是降伏遣魔法一經耳能

信能解不疑惑者其福勝彼爾時虛空中有

三善男子求菩薩乘自然而現漸漸而來各

各執持十大蓮華其華高廣踰須彌山有百

千萬億葉出百千萬億光明爾時尊者阿難

及諸時會皆共遙見三善男子求菩薩乘者

漸漸而來見已生希有心爾時阿難白佛言

世尊此善男子爲從何來佛告阿難東方過

恒河沙佛土有世界名華高須彌山此善男

子於彼世界聞說此法及上因緣以是故來
阿難白佛彼世界佛名號何等佛告阿難彼
佛名華高須彌山王如來等正覺今現在說
法爾時三善男子求菩薩乘者前詣釋迦牟
尼佛頭面禮足右遶三匝右膝著地一心合
掌以所執華而散佛上作如是言世尊我等
今於此法能信能解不生疑惑所以者何我
等於此法中無有疑惑猶如如來爾時第一
善男子求菩薩乘者白佛言世尊若作是說
我是如來此言便是正說所以者何我於此
法不生疑惑故爾時第二善男子求菩薩乘
者白佛言世尊若作是說我是世尊此言便
是正說所以者何我於此法不生疑惑故爾
時第三善男子求菩薩乘者白佛言世尊若
作是說我是佛此言便是正說所以者何我

於此法不生疑惑故

廣博嚴淨不退轉法輪經卷第三

音釋

躁則到切不很胡懇切羈居宜切僂力主切
端昌亮切蹶居月切
疾息也

廣博嚴淨不退轉法輪經卷第四

髮十

劉宋涼州沙門智嚴共寶雲譯

爾時會中百千衆生心皆擾動不安本座作是念無有二佛並出世間今此善男子以何等故發如是言作是念已展轉相語且共默然世尊在座自當解說此諸菩薩如是語義爾時阿難白佛言世尊此諸菩薩名字何等乃能作是大師子吼佛告阿難其一菩薩名樂求如來音聲第二菩薩名樂求世尊音聲第三菩薩名樂求佛音聲阿難當知以是緣故彼菩薩摩訶薩作如是說阿難白佛言世尊今此會中有百千衆生心皆擾動作是念無有二佛並出世間以何緣故彼作是說唯願如來敷演其義令此大衆心不擾動所種善根增益明淨世尊如人澡浴嚴治髮爪膚

色充潔復以赤梅檀木更浴其身膚色鮮淨倍勝於前世尊是諸衆生亦復如是若聞說是語義所種善根增益明淨倍勝於前爾時世尊即說偈言

皆共一心聽	我說是語義	何故名如來
世尊及佛耶	能知過去如	亦知未來如
見一切法如	是故名如來	如古昔諸佛
行不思議施	我亦行此施	是故作是說
如古昔諸佛	求無依倚道	我亦如是求
是故名如來	不住一切法	求寂靜菩提
亦不得菩提	是故名如來	如昔諸菩薩
勤苦行忍辱	我亦行是忍	能到忍彼岸
如我昔精進	勤求於菩提	彼亦勤精進
是故名如來	彼已能通達	諸法平等相
亦不生心念	是故名如來	不念一切法

其性常平等 知此平等已 而無差別心
已能通達此 如如平等定 通達此定義
是故名如來 所說一切法 各自有性相
已知此性相 畢竟常寂然 知相名為慧
知空名為智 若能知衆生 名到慧彼岸
如古昔智者 智慧到彼岸 亦不得此慧
到彼岸寂然 彼亦得此慧 而到於彼岸
不得此慧故 是故名如來 不得菩提如
其性相難議 不得一切法 是故名如來
已能逮無著 不著如如來 不著一切法
通無著道故 如先導世師 能知見正道
此道真實相 未曾有始終 彼亦如是修
最勝無上道 此道無始終 性空無所有
知道無始終 諸法皆平等 亦知如平等
是故名如來 道如菩提如 及與不住如

知如如虛空 是故名如來 我所說諸法
其如常平等 若能見此如 應當求菩提
阿難以是事 彼作如是說 如說能修行
彼亦如是行 若能行是行 能作如是說
知是不退轉 無畏諸菩薩 阿難應當知
無畏諸菩薩 能作如是說 自言是如來
阿難白佛言世尊以何因緣得何等法名世
尊耶爾時世尊便說偈言
皆共一心聽 於百千億劫 求如是菩提
無量難思議 爲諸衆生故 求如是菩提
未曾有怖畏 是故名世尊 不畏於生死
正住生死中 化度諸衆生 是故名世尊
云何不怖畏 云何住生死 云何度衆生
云何名世尊 生死無有法 而可破壞者
不牢不破壞 以此度衆生 是名不怖畏

是名住生死	是名度衆生	是名爲世尊
知諸法虛妄	而無怯弱心	宣說諸法相
而無所怖畏	已斷諸怖畏	遠離諸難處
不畏難處故	度難處衆生	度多億衆生
過生死險難	亦不得生死	及所度衆生
安置諸衆生	寂靜涅槃岸	亦不得衆生
是名爲世尊	恒爲諸衆生	說如虛空法
未曾生怖畏	是名爲世尊	法性無差別
說有種種名	不等如菩提	菩提不可得
教導諸衆生	令趣向菩提	雖教如是法
未曾有所說	不可說而說	度脫多衆生
無畏無所取	是故名世尊	遠離一切想
能修菩提想	已過一切想	是名爲世尊
已能滅諸想	煩惱無有餘	以是故得稱
名之爲世尊	以慧觀諸法	知諸法平等

尚不求少法 是故名世尊 不重於名譽
 亦不求名譽 恒爲諸衆生 說離名譽法
 菩提離名譽 彼亦如是求 若有重名譽
 是不近菩提 是聲猶如響 分別故多種
 橫生諸分別 我有如是名 不著一切聲
 亦不依倚名 無戲論菩提 是名爲世尊
 以如是諸法 名之爲世尊 亦不得菩提
 是故名世尊 知如是諸法 而無有所著
 求如是菩提 解脫無有漏 阿難以是事
 及諸餘因緣 菩薩摩訶薩 自言是世尊
 阿難白佛言世尊^{髮十}以何因緣得何等法名爲
 佛耶爾時世尊便說偈言^四
 覺知一切法 此法無所有 已覺無有法
 是故名爲佛 覺了諸煩惱 不令得自在
 以智離煩惱 是故名爲佛 能覺此身空

此身無所屬	此身不堅固	堅固不可得
愚於不牢身	而生堅牢想	彼如實覺知
是故名爲佛	覺無明無知	自性無所有
已得於明智	是故名爲佛	所有過去想
覺知是無想	知想無想故	更不隨此想
修未來諸想	現在想亦然	已修一切想
是故名爲佛	覺知色前際	未會有生起
凡小雖分別	不能令色生	覺受無根本
根本不可得	於一切法中	亦無有受者
知想猶如幻	其性無所有	於一切法中
不爲想所累	知行不能作	種種諸身相
身空行亦空	是故無所作	知行及與身
猶如芭蕉樹	如實能覺知	是故名爲佛
觀識之實性	亦不在身內	亦不在身外
而可有是識	於一切法中	識性不可得

而於此身中	無形無處所	能如是識知
識性無所有	無相猶如幻	未曾見識生
於一切法中	無有見識者	一切衆生性
未曾有作者	衆生無作者	諸法畢竟然
若法若衆生	無有來去相	覺一切諸法
畢竟無有相	無分別戲論	是故名爲佛
如諸佛不住	佛正法大乘	不住一切法
是故名爲佛	如如諸法如	諸佛不住如
佛如菩提如	畢竟不可得	爲求菩提故
應發如是心	能覺此心相	少法不可得
爲求菩提故	應發如是心	此心菩提等
亦覺知如幻	阿難以是事	彼作如是說
自言我是佛	如佛導世師	以佛之名聲
說如是等法	若有住此法	盡應求菩提
若有知此法	則是近菩提	於一切法中

不生諸疑惑 於諸法無疑 必爲世間上
以知此法故 能解密語義

爾時世尊說如來世尊佛名已是時會中百
千衆生白佛言世尊我等無復疑網逮大照
明得解菩薩摩訶薩名爲如來世尊佛義以

一切法不可得故於諸法中逮得法忍如來
今者猶如父母矜接我等不令我等心有擾
動亦得覺知不擾動法猶如虛空不可擾動
所以者何我等今者覺一切法猶如虛空無
擾動故爾時會中百千衆生頭面禮佛右遶
三匝去佛不遠默然而坐爾時會中有菩薩
摩訶薩名常笑諸根清淨即從座起以種種
華而散佛上即說偈言

衆生多果想 能解彼果想 離果得具足
故禮世間智 衆生貪著果 行種種果名

唯佛能除斷 第十 故禮世間智 六 宣說果平等

而以覺悟他 說果是假名 故禮世間智

宣說平等法 住平等法中 覺一切法等

故禮世間智 衆生得果想 除此有得心

唯佛能除斷 故禮世間智 具智果寂滅

不住種種果 諸佛善蜜語 故禮世間智

爾時常笑諸根清淨菩薩摩訶薩說是偈已

讚歎世尊頭面禮足右遶三匝去佛不遠一

心觀佛目不暫瞬歡喜而住爾時會中有菩

薩摩訶薩名蓮華德藏即從座起以華散佛

說此偈言

衆生多有想 能解此有心 離怖無所取

故禮牟尼尊 於諸有寂靜 說無所有法

遠離一切有 故禮牟尼尊 知有是空無

其性無有我 以遠離有畏 故禮牟尼尊

遠離諸憂惑 能拔憂惑者 永斷諸繫縛
故禮牟尼尊

爾時蓮華德藏菩薩摩訶薩說此偈已讚歎
世尊復更說偈而白佛言

於後惡世中 若有聞此經 不生怖畏者

皆應合掌禮

卷十

七

爾時無垢意菩薩摩訶薩即於佛前而說偈
言

若有聞此經 不生疑惑者 於一切時中
應以眾華散

爾時廣思惟菩薩摩訶薩即於佛前而說偈
言

此經中廣說 無量諸佛法 眾生聞是法
不疑惑者多 貪著於己身 生種種身想
得聞如是經 云是顛倒說 當知屬於魔

為魔所抑持 無智聞此言 返更生疑惑
爾時青蓮華目菩薩摩訶薩即於佛前而說
偈言

若有聞此經 不生疑惑者 猶如世間眼
亦名施眼者

爾時樂供養塔菩薩摩訶薩即於佛前而說
偈言

若有聞此經 深生信樂者 此人處世間
猶如最上塔

爾時渴仰意菩薩摩訶薩即於佛前而說偈
言

雖在生死中 應數生渴仰 不著一切法
能不疑此經
爾時樂以衣施菩薩摩訶薩即於佛前而說
偈言

應以多億衣 細軟而平整 以供覆其身
不疑此法者

爾時樂以食施菩薩摩訶薩即於佛前而說
偈言

所說諸餽饍 味中最上者 應以供其人

不疑此法者

髮十

爾時悲念樂見衆生菩薩摩訶薩即於佛前

而說偈言

悲念諸衆生 應數數涕泣 而於此經中

無有信樂意 若人少時間 疑惑於此經

當知地獄來 還趣向地獄 親近惡知識

不解是深法 無明網所覆 不向此妙趣

破戒自纏裹 惡意好求短 貪著於利養

能誹謗是經 不勤求菩提 懈怠不精進

惡慧樂小法 不信解是經 貪利養衆生

計我隨愛欲 染著於三世 不能信是經

愚很惡心性 染愛盲無智 好樂多談說

而不信此經 好選擇衣服 貪味嗜飲食

少於白法者 能誹謗是經 著果諸衆生

好說著果法 解佛微密語 如是者甚難

過去先昔佛 無上導世師 盡能供養者

能信解是經

爾時遠離惡法菩薩摩訶薩即於佛前而說

偈言

愚心貪著果 能誹謗是經 應遠離是人

猶如臭糞穢 亦如爛死屍 行者皆遠避

謗此經衆生 皆應常遠離 猶如劫村賊

住大曠野中 聞者皆馳走 恐爲我作難

應如是馳走 遠離是惡賊 瞋恚懷惡意

誹謗是經者

爾時阿難白佛言世尊甚爲希有是諸菩薩摩訶薩決定善說菩提之法世尊爲是自三昧力爲是佛威神力爲是此經三昧力能作是說耶佛告阿難是諸善男子曾於六十億那由他諸佛所聞說是經無有增減如我今者說微密語等無有異彼不以三昧力故能作是說所以者何彼於此經現見通達故爾時阿難白佛言世尊若有聞此經能信能解不生疑惑者世尊是善男子善女人得幾所福佛告阿難若善男子善女人欲求阿耨多羅三藐三菩提以滿閻浮提七寶施諸如來若有善男子善女人得聞是經信解不疑阿難當知其所得福甚多甚多阿難置閻浮提假使以恒河沙世界滿中七寶施諸如來若有得聞此經信解不疑其福勝彼爾時世尊

欲重宣此義而說偈言

若以閻浮提 滿中七寶施 奉諸佛如來
慈悲導世者 亦以恒河沙 數等諸世界
滿中諸珍寶 以奉上諸佛 若有聞此經
能信能解者 亦不生疑惑 其福勝於彼
爾時阿難白佛言世尊若有善男子善女人
聞是經能信能解已能信解復能受持讀誦
通利是善男子善女人得幾所福佛告阿難
若善男子善女人求阿耨多羅三藐三菩提
遠離是經於百劫中^十行檀波羅蜜奉施諸佛
如是於百劫中^十護戒忍辱精進禪定起五神
通修行智慧以遠離此經故不如善男子善
女人得聞是經信解不疑受持讀誦悉令通
利其福勝彼爾時世尊欲重宣此義而說偈
言

若滿百劫中	以種種餽饌	以供導世師
未名供養佛	若能持此經	是名供養佛
諸佛敬法故	是無上供養	若滿百劫中
以種種衣散	救世大精進	未名供養佛
若能持此經	是最勝供養	是名供養佛
勝前以衣施	若滿百劫中	以種種華散
救世大精進	未名供養佛	欲以最勝供
供養諸佛者	應當持是經	不染著諸果
此供是大供	諸供中最上	若能持此經
而不計於我	若滿百劫中	堅固守淨戒
若不持此經	彼皆無名稱	若能持此經
此戒有名稱	於諸戒中上	勝先行施戒
雖有純淨戒	無量難思議	應當常勤求
受持如是經	如此經中說	善修戒行者
不名為惡戒	亦不名破戒	若持此經戒

名持菩提戒	持菩提定戒	具足無作戒
如是等諸戒	皆於此經說	若能持此經
具足一切戒	若人滿百劫	能行大忍辱
衆生惡口罵	其心皆能忍	若截其手足
其心不擾動	未曾起惡心	瞋恨於他人
行如是忍辱	如忍辱仙人	雖經百劫中
其忍不爲上	若有聞此經	信解能堪忍
是忍名爲上	是忍名賢善	是忍名最勝
是忍無有上	若能持此經	而無所染著
欲求無染著	諸佛無上智	不應生染著
速受持此經	若滿百劫中	常立不坐卧
除却諸睡眠	勤行大精進	智者勤精進
流布如是經	是人到無畏	勝彼大精進
若滿百劫中	能起五神通	不得聞此經
其智不爲上	若能持是經	通達無依義

於諸神通中 是神通最上 若滿百劫中

修行諸智慧 此慧是世間 分別世間法

若不學此經 不名為明慧 若能學是經

是名堅固慧 若有聞此經 信樂無有上

是人名為慧 亦名通達者 欲以如是慧

能知諸法如 應宣說是經 當得如是慧

慧者所行法 皆此經中說 應當勤精進

受持於此經

爾時阿難即於佛前而說偈言

應往一由旬 乃至百由旬 聽受如是經

能捨離諸果 設有大火坑 縱廣一由旬

智者從中往 聽受如是經 欲得諸聖戒

於諸戒中上 應流布是經 能淨於戒身

欲得諸聖禪 於諸禪中上 應流布是經

燒一切煩惱 欲得諸聖慧 於諸慧中上

應流布是經 能淨諸法界 欲往詣諸方

嚴淨諸世界 世界名喜樂 應流布是經

欲見阿閼佛 諸牟尼中尊 應當持是經

廣為衆生說 若欲淨菩薩 種種之所行

應流布是經 欲往安樂界 得見阿彌陀

光明不可議 應流布是經 諸佛之所說

爾時世尊告阿難言善哉善哉如汝所言所

以者何若善男子善女人以不散亂心讀誦

此經為他解說欲見諸佛即皆得見若以散

亂心讀誦此經為他解說其人命終之時眼

見百千諸佛所以者何一切諸佛皆守護此

善男子善女人故爾時會中有一童女名曰

師子與五百童女俱即從座起偏袒右肩右

膝著地一心合掌白佛言若有女人受持此

經讀誦通利有何功德爾時世尊告師子言

若有女人欲求阿耨多羅三藐三菩提受持是經讀誦通利當知是身最是後邊所以者何若有女人以不散亂心受持是經讀誦通利所有煩惱受女身者不現在前師子白佛言世尊何等煩惱能受女身佛告師子凡

第十

十三

諸女人見他女人形容端正以金銀珍寶種種珠璣嚴飾其身受眾快樂見已生愛著心不能如實觀察此身但是糞聚臭穢不淨假以綵色衆香塗熏惑愚者眼便生染著起諸煩惱故受女身復次師子女人之性多諸慳嫉言說時異心思時異現前語異屏處語異爲氣味故有諸女人不爲正法瞋恨所蔽睡眠所蓋樂喜談說以是緣故不能受持此經又於晝夜多染汙心少出要心成就如是諸煩惱故恒受女身不能令止是故師子若有

女人欲不起煩惱不受女身者應當受持讀誦此經爲他解說所以者何此經能除女人諸煩惱故師子復白佛言世尊若有女人不爲離女身受持此經讀誦通利者當受女身不佛告師子若有女人雖不爲離女身受持是經讀誦通利當知此身最是後邊除其神足現女身者師子譬如有人投大火聚而作是言莫燒我身壞我膚色於意云何是人所語得稱意不師子白佛言不也世尊所以者何火性能燒壞人形色佛告師子此經亦爾燒諸煩惱令無有遺是故師子若有女人欲不受女身欲速得一切佛法欲得見無量無邊諸佛欲得無礙辯才欲以慈心遍緣一切衆生者應當受持此經讀誦通利爲他解說爾時師子及五百童女白佛言世尊我等

於然燈佛所受持是經如是展轉至于今日
爾時阿難白佛言世尊是師子童女未盡女
身分耶佛告阿難於意云何汝謂師子是女
人耶阿難白佛言如是世尊佛告阿難莫作
是言所以者何是師子及五百童女以神通

製十

十四

力現爲女身憐愍饒益未來世中諸女人故
所以者何一切男子不得隨意入諸家中是
故阿難師子童女以神通力現受女身而此
女人無女人法無男子法無非男非女法所
以者何女人法男子法非男非女法不可得
故阿難是師子於此法中不得一切法成就
法忍速大照明是故阿難一切女人應當隨
學如師子童女受持是經讀誦通利爲他解
說爾時會中有五千比丘尼即從座起偏袒
右肩右膝著地一心合掌白佛言世尊我從

今日受持是經讀誦通利爲他解說所以者
何我不願樂更受女身受持是經若不究竟
讀誦通利終不坐卧亦不睡眠佛告諸比丘
尼善哉善哉作如是言發大莊嚴而自莊嚴
建大精進所以者何汝等不樂女身樂求佛
法是故汝等倍加精進堅心受持讀誦是經
悉令通利爲他解說當知汝等所受女身最
是後邊爾時諸比丘尼聞佛所說歡喜踊躍
各各脫身所著鬱多羅僧以散佛上而說偈
言

製十

十五

佛無有二語 必成男子身 記我等作佛
我志願滿足

爾時會中有五千居士婦從諸比丘尼聞是
偈已即從座起偏袒右肩右膝著地一心合
掌白佛言世尊我從今者受持此經讀誦通

利爲他解說所以者何我等今日欲得遠離
不自在身視人顏色猶如婢妾女人之身雖
生王家長養令大婢與他王不得自在盡其
形壽奉事其夫懷妊十月受種種苦以是事
故我等從今勤加精進受持是經爲他解說
受一食法奉持齋戒脇不觸地乃至奪命誓
不與夫共携手親近要當受持讀誦是經爾
時世尊告諸居士婦言善哉善哉諸善女快
說此言汝等從今更不屬他常得自在不視
他顏色無懷妊苦不更處胎生無姪欲無女
人處諸佛世界爾時阿難白佛言世尊此諸
姊等所生之處世界何名佛號何等佛告阿
難世界名衆寶華光佛號放衆寶摩尼王光
如來等正覺今現在說法此諸女人當生彼
國諸居士婦受持是經故得見彼佛爾時諸

居士婦聞說是已皆生歡喜踊躍無量即解
頸十千真珠瓔珞持用上佛即於佛前而說
偈言

我等得善利 得遠離女身 佛無有二語
所說皆真實 永棄如是身 卑陋女人相
但誑無智人 不能如實知 更不如婢妾
屬他不自在 亦不復十月 懷妊受衆苦
終不復更受 處胎諸惡法 已得離胎相
此智無有上

爾時諸居士婦說此偈已頭面禮佛右遶三
匝去佛不遠皆共就座一心觀佛目不暫瞬
爾時釋提桓因以天拘數摩華而散佛上作
如是言世尊我當受持是經讀誦通利爲他
解說佛告釋提桓因憍尸迦汝若如是終更
不與阿脩羅戰爾時文殊師利法王子欲令

百千衆生所有善根轉明淨故白佛言世尊如來昔者從我聞說是經發菩提心佛告文殊師利以是事故汝於百千萬億那由他菩薩衆中最爲照明於十方世界開悟衆生如日光明即時大地震動天雨衆華遶佛世尊積至于膝爾時阿難白佛言世尊以何因緣大地震動散衆天華積至于膝佛告阿難今百千萬億那由他諸天從文殊師利聞說此言歡喜踊躍散衆天華皆發是言我等當受持讀誦是經爲他解說如文殊師利法王子快說是言我等亦當隨學如文殊師利照明世間我等亦當如是照明說此語時皆得憶念是經如現在前是故心生歡喜踊躍無量復聞我從文殊師利得聞此經阿難是故地大震動天雨衆華爾時阿難白佛言世尊此

經成就諸大功德髮十此經成就未曾有功德非是成就少善根衆生得聞此經佛告阿難如是如是如汝所言若善男子善女人供養無量百千諸佛乃聞是經聞已信解受持讀誦爲他解說阿難此善男子在天人中當知如塔若有受持讀誦是經者其所住方面便有明正法人復次阿難若有受持是經讀誦通利爲他解說乃至書寫經卷而供養者當知是人離諸惡趣已能降伏惡魔波旬建立法幢能行法施然大法炬破無明闇吹大法螺趣向道場擊大法鼓開甘露門降大法雨充足一切樂求法者開諸法藏諸佛所聚出大法財知一切法遠離諸想所謂色受想行識想眼耳鼻舌身意想色聲香味觸法想遠離一切諸法想乃至佛法僧想阿難若有從

我聞此經者受持讀誦當知是人便是我子
從佛口生從法身生是故阿難若有衆生欲
食如來食欲坐道場欲說正法如我今者應
受持是經讀誦通利爲他解說乃至書寫經
卷而供養之爾時阿難白佛言世尊未來世

中受持是經讀誦通利爲他解說乃至書寫
經卷而供養者皆是今日受持讀誦是經者
耶佛告阿難如是如是所以者何我未曾見
諸餘世間天人魔梵沙門婆羅門人及非人
於未來世能說是經令他聞者無有是處阿
難能於今日積聚法財於未來世隨意受用
譬如居士若居士子其家大富多饒財寶金
銀瑠璃眞珠摩尼珂貝璧王倉庫盈溢奴婢
僮僕象馬牛羊如是衆多徃至餘方遊戲觀
看其人後時還至財所得受用不阿難白佛

髮十

十八

言世尊自在受用是其財故如是阿難若於
我前得聞是經於未來世亦復得聞受持讀
誦如是經典而設供養猶如今日阿難我以
佛眼見有信解受持是經讀誦通利爲他解
說乃至書寫經卷如今阿難而供養者亦見
誹謗不信受者爾時阿難白佛言世尊若有
衆生不信解是經而誹謗者其人罪報當生
何處佛告阿難且止不須問也阿難白佛言
世尊唯願說之爲不信此法衆生生信樂故
佛告阿難其人果報生處與五無間業等阿
難於意云何假使有人於一日中悉斷三千
大千世界衆生命根其人生處罪報云何阿
難白佛言甚惡世尊佛告阿難其人罪報亦
與彼等阿難於意云何假使有人若壞若燒
恒河沙諸佛般涅槃後所起塔廟得罪多不

阿難白佛言甚多世尊眼不應視耳不應聞
佛告阿難其人生處罪報云何阿難白佛言
世尊甚惡甚重佛告阿難其人罪報亦與彼
等阿難於意云何假使有人壞亂過去未來
現在諸佛正法其罪云何阿難白佛言甚惡
世尊佛告阿難其人罪報亦與彼等阿難白
佛言世尊若有毀訾誹謗令衆生遠離是經
其罪云何佛告阿難於意云何三千大千世
界衆生皆行十善求阿耨多羅三藐三菩提
假使有人毀壞其眼其罪多不阿難白佛言
甚多世尊當於百千萬億那由他劫在地獄
中受諸苦惱佛告阿難我今語汝若有衆生
毀謗此經乃至一人令遠離者當知此罪亦
與彼等阿難白佛言世尊若有菩薩欲求阿
耨多羅三藐三菩提於此經中雖有疑心而

不誹謗其罪云何佛告阿難若生疑心則逆
諸佛而有罪過經一億劫遠離菩提阿難白
佛言世尊若有衆生誹謗是經令多衆生而
遠離者所受罪身大小云何佛告阿難且止
不須問此罪身大小阿難白佛言世尊唯願
說之令此四衆來世衆生慚愧怖畏佛告阿
難其人罪身長一萬由旬受無量苦阿難白
佛言其人不能護口所受舌報大小云何佛
告阿難其罪人舌縱廣一千由旬有五百鐵
犁光焰熾然以耕其舌復以五百鐵丸光焰
熾然滿其舌上以其前身不護口故爾時四
衆皆生怖懼身毛皆豎涕泣流淚舉身投地
皆共同聲作如是言世尊我等今者爲彼族
姓子族姓女發露懺悔願令速離如是罪身
不受衆苦會中復有涕泣流淚作如是言世

尊我等若於此生若前百千萬億那由他生
曾起疑心作是衆苦因緣者我等今於如來
等正覺前及餘百千萬億不可限量諸佛世
尊前發露懺悔諸佛如來願以佛眼見知我
等我等今者所有罪業皆悉發露不敢覆藏
我等愚小無知無覺無有方便唯願諸佛以
憐愍故受我等悔佛告諸善男子善哉善哉
汝等今於我前不覆藏罪發露懺悔於我法
中更爲增益阿難白佛言世尊今此會中生
疑心者皆受如是地獄苦耶佛告阿難今此
會中生疑心者以悔過故其罪甚少阿難白
佛言彼人受罪爲多少耶佛告阿難其人命
欲終時身上一一諸毛孔中受無量苦亦不
經久所以者何以於我前及餘無量無邊諸
佛世尊悔過罪咎阿難是故諸族姓子族姓

女不欲受如是罪身如是罪舌如是衆苦者
應當信解是經莫生疑惑阿難若有善男子
善女人不欲捨佛捨法捨比丘僧不欲捨過
去未來現在諸佛正法者應受持是經讀誦
通利爲他解說書寫經卷而供養之阿難白
佛言世尊如來今者說不退轉輪經以何緣
故作如是說若不捨僧不捨何僧佛告阿難
僧者所謂不退轉者說名爲僧爲不退轉法
來集會者亦名爲僧阿難白佛言退轉菩薩
不在僧數中耶佛告阿難若有深發菩提心
不見此心者皆入不退轉僧中阿難白佛言
希有世尊諸佛成就大方便力以方便故說
如是法爾時釋提桓因以天曼陀羅華而散
佛上白佛言世尊願令一切衆生皆成就如
是方便佛告釋提桓因憍尸迦若有信解此

經者皆當成就如是方便演說諸法如我今者等無有異爾時有百千諸天以天曼陀羅華而散佛上作是言願令一切衆生逮得是經爾時阿難白佛言世尊唯願如來憐愍未來衆生守護是經佛告阿難若善男子善女人在大海中應聞是經是善男子善女人皆悉得聞所以者何先佛如來已守護故阿難白佛言世尊先佛如來雖守護是經如來今者憐愍衆生當守護是經爾時大地六種震動即於佛前有閻浮提金色天華自然而現其華有百千萬億葉出大光明遍照十方恒河沙諸佛世界是時四衆皆見十方恒河沙世界諸佛世尊是諸佛前亦有閻浮那提金色天華有百千萬億葉自然而現出大光明遍照十方爾時釋提桓因即自化身作居士

形持種種華與諸四衆作是言諸仁者今可以此華散如來上亦用供養是經法故是時四衆即取其華散如來上佛神力故所散之華於諸佛上變成華蓋是時四衆白佛言世尊以何緣故大地震動是大華蓋於諸佛前自然而現乃至東方恒河沙諸佛世界南西北方四維上下恒河沙諸佛世界亦復如是佛告四衆若先有此相當知諸佛已守護是經爾時阿難白佛言世尊如來今者已守護是經耶佛告阿難如是如是我已守護阿難髮十白佛言唯佛世尊守護是經餘世界佛亦守護是經耶佛告阿難十方恒河沙諸佛世界亦守護是經阿難白佛言世尊當何名此經云何受持佛告阿難此經名不著諸果亦名遠離諸果亦名說堅信堅法八人須陀洹斯

陀舍阿那舍阿羅漢聲聞辟支佛密義亦名
降伏遣魔亦名與六波羅蜜相應所以者何
若善男子善女人信解此經受持讀誦乃至
書寫經卷而供養者便具足修行六波羅蜜
阿難白佛言世尊云何信解是經受持讀誦
具足修行六波羅蜜耶佛告阿難若善男子
善女人信解是經名檀波羅蜜不生疑惑名
尸波羅蜜堪忍此法名羣提波羅蜜心無怯
弱名精進波羅蜜心不搖動名禪波羅蜜不
分別一切法名般若波羅蜜是故阿難此經
名六波羅蜜相應亦名一切諸佛正說亦名
廣大不退轉輪亦名廣博嚴淨不退轉輪阿
難如是等名汝當受持阿難白佛言世尊聞
此經名尚應聽受何況具聞初中後說佛告
阿難如是如是如汝所言阿難白佛言世尊

若有得聞此經名者能却幾劫生死耶佛告
阿難若有得聞廣博嚴淨不退轉輪經名者
聞已信解阿難當知是諸衆生得却百千劫
生死阿難白佛言世尊若有衆生得聞是經
能信解已發菩提心者逮得何法佛告阿難
如是衆生已逮受記當得阿耨多羅三藐三
菩提爾時四衆各各自見其所坐前有大蓮
華自然而現其華開敷有百千葉亦有百千
萬億光色是時四衆心生歡喜踊躍無量即
取是華以散佛上作如是言願使我等於未
來世宣說是經猶如世尊等無有異爾時世
尊即便微笑當爾之時一切音樂不鼓自鳴
一切衆香自然芬薰百千萬億虛空諸天於
虛空中作天音樂復有百千萬億諸天於虛
空中雨天細末栴檀種種天香天阿迦樓香

卷十

三

細鉢多摩羅香復雨天閻浮那提金粟銀粟
天摩尼寶復雨曼陀羅華摩訶曼陀羅華波
樓沙華摩訶波樓沙華曼殊沙華摩訶曼殊
沙華迦迦羅華摩訶迦迦羅華樓遮摩那華
摩訶樓遮摩那華輪婆摩那華摩訶輪婆摩
那華天優鉢羅華拘物頭華芬陀利華如是
衆華而散佛上種種天香種種天鬘乃至諸
天所有珍寶皆悉雨之虛空諸天降身在地
而作音樂以供養佛世間諸人各各脫身所
著上服而散佛上復有諸人脫手足瓔珞咽
臂瓔珞所著天冠華鬘而散佛上復有諸人
以金銀天冠衆寶天冠衆華天冠梅檀天冠
散佛上者復有諸人歡喜踊躍稱慶無量當
爾之時牛馬歡喜出和柔聲虛空衆鳥出和
雅音地獄畜生離苦獲安餓鬼充足離飢渴

苦天龍夜叉乾闥婆阿脩羅迦樓羅緊那羅
摩睺羅伽人非人等皆悉歡喜踊躍無量是
時衆生皆得慈心慈心相向無有忿恨爾時
阿難白佛言世尊以何因緣世尊微笑諸佛
如來不以無緣而笑爾時世尊告阿難言今
此四衆比丘比丘尼優婆塞優婆夷天龍夜
叉乾闥婆阿脩羅迦樓羅緊那羅摩睺羅伽
人非人等今於我所得聞此經及未來世得
聞遇者皆於阿耨多羅三藐三菩提而不退
轉後成佛時宣說是經無有增減如我今日
等無有異佛說是經時有無量無邊不可思
議不可限量百千萬億那由他天龍夜叉乾
闥婆阿脩羅迦樓羅緊那羅摩睺羅伽人非
人等皆於阿耨多羅三藐三菩提而不退轉
佛說是經已文殊師利法王子無量無邊諸

髮十

千四

菩薩摩訶薩尊者阿難諸大聲聞及諸四衆
比丘比丘尼優婆塞優婆夷天龍夜叉乾闥
婆阿脩羅迦樓羅緊那羅摩睺羅伽人非人
等及諸世間聞佛所說皆大歡喜
廣博嚴淨不退轉法輪經卷第四

音釋

髮十

二十五

瞬

舒閑切
目動也 屢提 梵語也此云忍
辱羣初限切